

# **Polota Kolin sos dla yu ilimale hamili 1 Kolin 1 Kolin buka ya: dulu koko**

Kolin moye Guliki so yia: mo patopo. Epapeleye Polotapo ya: tate ka:yapa mo pato edla ka:dle yuye hamtauwapo. Epame alotle ya: sokomoko opi mo-pololepo Epeses mo dla halemama dallati Kolin sos dulu dla hukulli elaleye daliyo. Epalati Polotapo yu ilimale iye Kolin sos dla hamiyo. Yu ilimale dulu hema ya:tapo ipapele kokoye ilimaiyo. Mikadepe dle so dulu dla hukulli koko mate epo wola: halomolowe koko mate epo biskapa god dla sisiyelowe koko mate epo Lod malamale daya dlowe koko mate epo Sokota isikimi hapimhala koko mate epo Yesuta wabasi tle ma sila:tili koko mate epo mikadepe dle sota ma wabasi tle silliwede koko mate.

<sup>1</sup> Na:ye Polopo. Godtapo ya:ta solotamale tle na:ye mo-sauwapo, na:tapo Yesu Keliso ya: Taiya dle oko hamhallepo depame. Epedeme na:tapo di ei Sostenes mate yu iye ilima.

<sup>2</sup> Na:tapo God ya: opa Kolin mo dla ha:ha: so wua: dla yu iye ilipo hamima. Adipalati, Godtapo Yesu Keliso tle wua:ye ya: opa dlepo depame sisilamuwapo. Epedeme Godtapo wua: sisilamuwa, epammama ya:tapo mo hapuloma dulu dla opaye ma-sisilamuwapo. Epame ma yia:tapo di Lod Yesu Keliso hiye sisilamha:ha:po. Adipalati, hatlo

ya:tapo yimkata yia: mate epo dia: mate di Lod halapo.

<sup>3</sup> Epedeme di A God mate epo di Lod Yesu Keliso mate yia:ta bokotiyapo malamale mate epo sadle mateta wua: mate hallepe.

*Polota God dla siyele yu atlale*

<sup>4</sup> Godtapo Yesu Keliso tle wua: dla bokotiyapo malamale hamiwa koko tle na:tapo alila hapuloma wua: yilo God dla siyele yu atloweye pomelesemde.

<sup>5</sup> Epapedeme wua:tapo Keliso dulu dla ha:ha:lati Godtapo wua:ye sikemte gadle tle wua:ta ka:dle yu ka:pi atlowe mate epo ka:dle malamale halowe mateye wua: dla hapiwapo.

<sup>6</sup> Koko itapo na:ta wua: watle Keliso koko atluwaye mikadepe depo.

<sup>7</sup> Epapedeme Sokotapo wua: dla isikimi namkale dle tle wua: watle ka:ka:dle koko hapuloma meyelope meyelope dleye mahapiwapo, wua:tapo di Lod Yesu Kelisota puluwe dla dalemha:ha:mama omha:ha:lati.

<sup>8</sup> Godtapo wua:ye woloma omhalemama itiyamale hamilalo halapo, wua:tapo Yesuta puluwe alila dla ullu pa:po ha:ha:lepo depame.

<sup>9</sup> Adipalati, Godye ya:ta yu itiyamale himili dolumolowe dla pomelesemde. Epedeme ya:tapo wua:ye ma-sisilamuwapo, wua:tapo Yami Yesu Keliso mate hatlope depo ha:ha:lepo depame. Adipalati, ya:ye di Lodpo.

*Kolin sos dulu dla hukullita elale*

<sup>10</sup> Mikadepe dle so namkadulo, na: Yesu Keliso hi tle wua:ye molo atlema, wua:tapo

wua: dulu dla hukulupo ha:ha:mama yu topulolemha:ha:ye medla gudepame matle sadle dulu dla ha:ha:mama hatlope depo ha:ha:lepo depame.

<sup>11</sup> Adipalati, a:ya Kalowe aya dulu dla ha:ha:lalo sotapo wua:ta yu topulolle dulu dla ha:ha: kokoye na: watle puame atluwa.

<sup>12</sup> Epedeme wua: dulu dla yu topulolemyemama opita epo atlamyapo, “dia:ye Polo dolumalalo sopo,” epalati ma opita atlemama, “dia:ye Apolos dolumalalo sopo,” epalati ma opita atlemama, “dia:ye Pita dolumalalo sopo,” epalati ma opita atlemama, “dia:ye Keliso dolumalalo sopo,” demyapo.

<sup>13</sup> Epele dulu dla Keliso moto hukulluwe ka:deta? Epame Polo na:tapo wua: yilo dali yekelehmihili di dla pouwa? Epame wua:ta hapuloma Polo hi tle yú tutula:uwa? Hao, pepapena.

<sup>14</sup> Epedeme na: siyema, adipalati, na:tapo wua: hapulomaye yú dla poka:ka:timana. Amasiyama opa dapiyamte Klispus mate Gaiyus mate tlo na:ta yú dla ka:ka:timuwapo.

<sup>15</sup> Epele dulu dla ma oplami haleta wua: dulu tle atlemama, “dia:ye Polo hi tle yú tutula:uwa,” dlowe ye po-ala:na.

<sup>16</sup> Epame na: matle malama, na:ta yú dla ka:ka:timuwa so opa opiye. Na:ta yú dla ka:ka:timuwa so opa ewoloye, Stepanas mate epo ya: aya dulu dla ha:ha:lalo so matepo. Epame ma etle na: ma pomalamasema, na:ta opa opi yú dla ka:ka:timuwa soye.

<sup>17</sup> Amasiyama Kelisotapo na:ye opa yú dla

ka:ka:timelepo depame potane dena. Asiyama ya:tapo na:ye isikimi opa dla ka:dle yu tlo insela:lepo depame tane duwapo. Epele dulu dla ya: posolotamasema, na:tapo ka:dle yu atlale dulu dla ta:lamo malamale tle ka:depo atloweye. Adipalati, opatapo epapele yu dalemama asiyama Kelisota dali yekelehmihili di dla powaleye pokoko dlala depame.

*Kelisoye Godta itiyamale mate epo malamale matepo*

<sup>18</sup> Dlapa mo dla tamala sotapo dali yekelehmihili kokoye yiyilamale koko demdepo. Amasiyama Pepele dimo dla hetlalo so ditapo dali yekelehmihili koko e natimama Godta itiyamale koko demdepo.

<sup>19</sup> Adipalati, God yu bukata epo atlapo, “Na:tapo ta:lamo koko tle sikemte di dla momalamale sota malamaleye batalipo hamastlowepo,” depo.

<sup>20</sup> Epapedeme ta:lamo koko tle sikemte di ikadepe dla momalamale soye hadima ha:ha:ma:? Adipalati, Godtapo sikemte di ikadepe dla momalamale so iwolota malamale hapulomaye mo-totokoleyapopo hamastapame yiyilamale koko duwapo.

<sup>21</sup> Epapedeme Godta malamaleye pta ka:pi. Epapedeme God meyelo opata ta:lamo malamale koko tle ya: koko malamolowe apiye himomeluwapo. Amasiyama ya:tapo opata ta:lamo malamale tle natimama yiyilamale koko demde koko tle mikadepe dle so hapuloma dla yia: pasakalo gadloweye hampuwapo.

<sup>22</sup> Epele dulu dla Yu sotapo koko opi dla mikadepe dlowe me-hallati ka:yapa yia: tatile ulugiyemale koko natilowe tlo solotamapo. Epalati asiyama po-Yu sotapo di dla malamale kokoye totamyapo.

<sup>23</sup> Epapedeme ditapo Kelisota dali yekelemhimili di dla powale kokoye imsiyamalati Yu sota dalepame hala allimdepo. Epalati asiyama po-Yu sotapo dali yekelemhimili koko eye yiyilamale koko demdepo.

<sup>24</sup> Amasiyama Yu so dulu tle Godta sisilamale so mate epo po-Yu so dulu tle Godta sisilamale so mateta Kelisoye Godta itiyamale mate epo malamale matepo demdepo.

<sup>25</sup> Epele dulu dla opatapo yiyilamale koko dlaloye Godta e hapame ma yia:ta malamale kokoye ma-tla:mtauwapo. Epame opatapo hopeyalimale koko dlaloye Godta e hapame ma yia:ta itiyamale kokoye ma-tla:mtauwapo.

<sup>26</sup> Epapedeme mikadepe dle so namkadulo, Godta ka:yapa wua: sisilamuwa oloma edla wua:ta ha:ha:uwa pasakaloye wua: tlo wua:malamana. Adipalati, wua: dulu dla ta:lamo tle di dla momalamale so mate epame dokopala so mate epo alisisi poposatilimale so mateye pase pasatana.

<sup>27</sup> Epapele dulu dla Godtapo ta:lamo sota natili tle yiyilamale koko dlalo mate yia:ta malamaleyey ma-tla:mtauwapo. Epo matle ya:tapo ta:lamo sota hopeyalimale koko dlalo mate yia:ta itiyamaleyey ma-tla:mtauwapo.

<sup>28</sup> Epedeme Godtapo ta:lamo sota posolotamalalo wekelalo soye hohopame ma ta:lamo sota ka:ka:dena dlalo soye ma-tla:mtapame ma koko

pa:talo so duwapo.

<sup>29</sup> Epapedeme Godtapo koko iye dinapuwapo, oplami haletapo koko hema ma ya: mila:pi tle ya:skamu di dla hamhetlala depame.

<sup>30</sup> Hatlo Godta koko halë tle wua:tapo Yesu Keliso dulu dla ha:ha:po. Epame Godtapo Kelisoye dita ka:depo malamalalo sitali duwapo. Epame ma ya:tapo dia:ye ullu pa:talo so depame ka:ka:dena duwapo. Adipalati, Kelisotapo di batalimale yilo popame ma dia:ye God hala dla eleme puwapo.

<sup>31</sup> Epapedeme God yu bukata epo atlapo, “Oplami antapo ya:skamu di dla hamhetlowe solotamelepiye, ya: ka:dena, isikimi Lodta koko halë tlo di dla hamhetlepe.”

## 2

*Polota Hela:dle Soko dla hitahalemama yu atlale*

<sup>1</sup> Mikadepe dle so namkadulo, na:ta ka:yapa wua: hala dla puwa oloma edla na:tapo ta:lamo koko tle sikemte malamale mate halemama God yuye po-atlana.

<sup>2</sup> Adipalati, na: solotamuwa, isikimi Yesu Keliso koko mate epo ya:ta dali yekelehmihili di dla pouwa koko mate tlo wua: dla atlamolowedeme apuwapo.

<sup>3</sup> Epapedeme na:tapo puame wua: mate haluwa oloma edla na: dla wota:leta hamama hopeyamale mate epo eseselalle mate haluwa.

<sup>4</sup> Epame na:ta wua: mate yukamsela:le dulu dla epo na:ta God yu atlale dulu dla woloma ka:pi

ta:lamo malamale mate po-atlemdena, wua:ta na: yu dla dalepame mikadepe dlepo depame. Amasiyama na: Hela:dle Sokota itiyamaleye haliyamale dla botomastamama ammduwapo.

<sup>5</sup> Adipalati, na: posolotamdena, wua:ta mikadepe dle kokotapo isikimi opata malamale tama di dla halloweye. Amasiyama na: solotamduwa, wua:ta mikadepe dle kokotapo woloma Godta itiyamale tama di dla hallepodepo ammduwapo.

### *Godta malamale koko*

<sup>6</sup> Ditapo mikadepe dle dulu dla mo-opa dle so mate yuhamama Pepele dimo malamale mate yuhamdepo. Malamale iye pota:lamo malamale epapena, epame pota:lamo dokopala sota malamale pe-epapena. Adipalati, yia:ta itiyamaleye pa:lepe.

<sup>7</sup> Di asiyama Godtapo hemele hatiyomelle malamaleye atlamsiyamapo. Ta:lamo ala pomita:plalo halemama Godtapo malamale i mate dia:ye hela:dle dla eleme tlowedeme yu himiwapo.

<sup>8</sup> Amasiyama ta:lamo dokopala sotapo malamale iye woloma pomalanatina. Yia:tapo woloma malanatimatiye, etapo yia:ta di Hela:dle Lodye dali yekelehmihili di dla pogogodema.

<sup>9</sup> Koko iye God yu bukata atlemama epo atlapo, “Godtapo ya: dla sikemte malaha:ha:lalo so opa dla hamilowedeme ka:depo dinapopo himili kokoye  
oplami haleta ponatina,  
epame oplami haleta podalena,

epame opata malamale sitali dla puame po-  
umana.”

<sup>10</sup> Epapele tlope koko iye Godtapo ya: Soko tle dia: dla me-imuwapo. Adipalati, Sokotapo koko hapulomaye malastepo halapo. Epedeme ya:tapo Godta malamale sitali ma malastepo halapo.

<sup>11</sup> Epedeme oplamita malamale sitali dulu dla koko hutiyehapulomaye isikimi ya: dulu dla hala sokota malastame halapo. Epapedeme God ya: Hela:dle Soko siyapota Godta malamale sitali dla koko hutiyehapulomaye malastepo halapo.

<sup>12</sup> Epedeme ditapo ta:lamo sokoye pohamana. Amasiyama ditapo God tle ya: Sokoye hamuwapo, ditapo Godta dia: watile hapili koko hapulomaye malastepo ha:ha:lepo depame.

<sup>13</sup> Epele dulu dla Godta hapili koko eye dita imsiyama kokopo. Epedeme dita imale kokoye opata malamale tle popuasemde, amasiyama Sokotapo imale kokopo. Epedeme ditapo ikadepe Sokota imale kokoye Soko watalo so dla imdepo.

<sup>14</sup> Amasiyama pomikadepe dlalo wekele sotapo God ya: Sokota imale koko halomoloweye allimdepo. Adipalati, yia:ta malamaletapo God ya: Sokota imale kokoye yiyilamale koko demdepo. Epele dulu dla yia:tapo koko iye woloma poma-lamolowa. Adipalati, yia: dla God ya: Soko pohalasema.

<sup>15</sup> Epedeme Soko poposatilimale sotapo koko hapuloma i hukuloweye ka:dena. Amasiyama opa opitapo Soko poposatilimale so yia: koko hukuloweye poka:dena.

<sup>16</sup> Adipalati, God yu bukata epo atlapo,  
“Oplami antapo Lodta malamale sitali malastepo



halema:?

Epame oplami antapo Lodye imolowe  
ala:ta:?” depo.

Amasiyama dita koko i momalamoloweye ala:na.  
Adipalati, di Kelisota malamale epapeleye ma-  
halomuwapo.

### 3

#### *Di yimkata God okoye hamha:ha:po*

<sup>1</sup> Epapedeme mikadepe dle so namkadulo,  
na:tapo ka:yapa wua: dla yu atlamama mo-  
mikadepe dle dulu dla mo-opa depo ha:ha: so  
dla yu atlamdiye pe-epapena. Adipalati, wua:ye  
mikadepe dle dulu dla ala owayimlala some  
ha:ha:mama ta:lamo sota ha:ha:le epapele some  
ha:ha:uwapo.

<sup>2</sup> Epedeme wua:tapo daya kokalalimale  
dloweye ala po-ala:lalo ha:ha:la natipame na:tapo  
isikimi wua: dla meme ilimuwapo. Amasiyama  
ma wata oloma hema wua: ala meme siyapo tlo  
me-dlomha:ha:po.

<sup>3</sup> Adipalati, wua:ye ala mota solotamale kokota  
wua:ye eleme siyamapo. Epedeme wua: dulu dla  
ya:mkale ellewe koko mate epo yu topulolle koko  
mate ala me-hutiye tle di malanatipo, wua:tapo  
ala ta:lamo sota ha:ha:mde epo ha:ha: kokoye.

<sup>4</sup> Adipalati, wua: dulu dla opa opita atlemama,  
“na:ye Polo dolumalalo oplami,” dlati ma opita  
atlemama, “na: Apolos dolumalalo oplami,” de-  
mya kokotapo wua:ta ala ta:lamo so some ha:ha:ye  
nati-ipo.

<sup>5</sup> Epele dulu dla Apolos mate na: mateye isikimi  
God ya: oko sopo. Ditapo Godta dia: dla oko

hamilati wua:ta mikadepe dlepo depame wua: gaduwapo.

<sup>6</sup> Na:tapo isikimi wua: dupa dulu dla God yuye dlomoko ale some emtlati asiyama Apolostapo yú sisimamlalo haluwapo. Amasiyama Godtapo wua: dulu dla mikadepe dle koko eta peyapo ta:lepo depame itiyamale hamilalo haluwapo.

<sup>7</sup> Epedeme emalalo oplami mate epo yú sisi-mamlalo oplami mate yia: kokoye pase sikemte pato. Amasiyama emale alisisi eta peyapo ta:lepo depame itiyamale hamilalo God tlo pta koko pato halapo.

<sup>8</sup> Epedeme emalalo oplami mate epo yú sisi-mamlalo oplami mate yimkata koko hatlo yilo oko hapo. Amasiyama yia:tapo oko meyelope meyelope dle halomale e mate ala:le asiyamaye halomelepe.

<sup>9</sup> Epedeme dita madipata Apolos mate God ya: oko hamha:ha:mama ya: osalo dulu dla oko hamha:ha:po. Epalati asiyama wua:tapo God ya: osalo some halapo.

Epame wua: mape God ya: aya some halapo.

<sup>10</sup> Epele dulu dla Godtapo namkale dle tle na:ye ma-ka:dena dlati na:tapo ka:depo aya halalo oplamita aya halowedeme saka mate alumiti mate kellemdiye, epammama na:tapo saka mate alumiti mate wua: dulu dla ma-kelliwapo. Epalati ma asiyama oplami haletapo na:ta kelle saka mate epo alumiti mate e tama di dla aya hapo. Amasiyama ya: wolomape! Aya woloma ka:depo halepe.

<sup>11</sup> Adipalati, hatlo Kelisotapo dita aya ha dulu hema saka mate epo alumiti mate halapo. Epa-

peleye oplami haleta saka mate alumiti mate ma amko pokellowa.

<sup>12</sup> Aya halalo so opitapo saka mate alumiti mate kelle e tama di dla aya hamama ka:ka:dle itiyamale alisisi ipapeletapo aya hamdepo. Eye gold ewalapo epame silba ewalapo epame ewala opi ka:ka:dle matepo. Amasiyama aya halalo so opitapo pase itiyamale alisisi ipapele mate hamdepo. Eye biskapa dalipo epo osamokolopo epame pelamu upapo.

<sup>13</sup> Ditapo alumiti mate epo saka mate kelle e tama di dla apa alisisi mate aya halepiye, asiyama koko gladle alila dla aya eye ka:depo hata: depame opa hapuloma inoma dali dla dlapata mistla natilipe.

<sup>14</sup> Epele dulu dla dita aya haletapo dlapa dulu dla me-kokalepo pollopiye, eta di asiyama halepe.

<sup>15</sup> Amasiyama oplami antapo biskapa alisisi mate aya halë hallepiye, dlapata aya eye mosukulu hamdepo hamastlepe. Amasiyama yo aya halë oplami eye dlapa dulu metle teletale some hallati asiyama Godta mepele ya: pasakaloye gadlepe.

### *Wua:ye God ya: aiyalma ayapo*

<sup>16</sup> Epedeme wua: powua: malamata:, wua:ye God ya: aiyalma ayapo? Epedeme God ya: Sokotapo wua: dulu dla halapo.

<sup>17</sup> Epele dulu dla oplami haletapo God ya: aiyalma ayaye batalimelepiye, asiyama Godtapo oplami eye batalipo hamastlepe. Adipalati, God ya: aiyalma ayaye pta aiyalma ikadepepo. Epedeme aiyalma aya eye wua:po.

<sup>18</sup> Epedeme wua: koko iye woloma haiya. Adipalati, oplamitapo woloma ka:depo malamale mate halli dlepiye, ya: ka:yapa ta:lamo malamale sota natili tle ya:ye yiyilamale oplami some hallepe.

<sup>19</sup> Adipalati, ta:lamota malamale hamili kokoye Godtapo yiyilamale koko demhalapo. Adipalati, God yu bukata epo atlapo,  
 “Opa miyelo ta:lamo koko tle malamaletapo dea susumale some hallati  
 asiyama Godtapo yia:ye edla ka:ka:tipo homhalapo.”

<sup>20</sup> Epame God yu bukata matle epo atlapo,  
 “Lodtapo ta:lamo tle sikemte di dla momalamale halë sota malamaleye malastepo halapo.  
 Epapedeme yia:ta momalamale koko eye asiyama ya:tapo pokoko demdepo.”

<sup>21</sup> Epedeme wua:tapo wua: dokopala so opi tlo ka:ka:dena demama asiyama opi tlo allimiya. Adipalati, koko hapulomaye wuolepo.

<sup>22</sup> Polo mate epo Apolos mate epame Pita mateye wua: gadlepo depame wua: watile hapiwapo. Epame ta:lamo mate epo pasakalo mate epo polowe mate mape wua: watile ma-hapiwapo. Epame ma wata ha:ha: i ya: koko mate epo ma alotle ha:ha:lowe ya: koko mateye wua: watile ma-hapiwapo. Koko hapuloma iye wuolepo.

<sup>23</sup> Epele dulu dla wua:ye Keliso tetepo. Epalati asiyama Kelisoye God tetepo.

## 4

*Taiya dle so yia: oko koko*

<sup>1</sup> Epedeme wua:tapo na: mate epo Apolos mate-ye Keliso ya: oko sopo dloweye ka:dena. Adipalati, Godta meyelo hemele hatiyomelle kokoye ma haliyamale opa dla atlepo depame dia:ye homuwapo.

<sup>2</sup> Epedeme Godtapo oplami haleye sepame oko hamilipiye, ya: solotamapo, oplami etapo woloma hutulli mate oko ka:depo halepo depame.

<sup>3</sup> Amasiyama na: oplami haleta o wua:tapo na: oko kokoye gladlowe dla na: pokoko desema. Adipalati, na: mape naskamu na: kokoye pogladesemde.

<sup>4</sup> Ame adipalati, na:ta malamale sitalita na:ta oko halë batalipo hauwa kokoye po-imasema. Amasiyama epapele kokota na:ye Lod mila:pi tle ala poka:dena desema. Adipalati, hatlo Lodtapo na: oko natipame koko gladlepe.

<sup>5</sup> Epedeme Lodta ala populalo hallati ha:ha:mama yipta yimkadulo kokoye glademha:ha:miya. Adipalati, Lodtapo puame hemele amtuwale dulu dla hutiye koko mate epo opata hemele yia: dupa dulu dla momalamde koko hapuloma mateye haliyamale dla bobotimatimelepe. Epame oloma edla opa hapulomatapo yia:ta halomha:ha:le koko hapuloma mate ala:leye God tle asiyama halomelepe.

<sup>6</sup> Mikadepe dle so namkadulo, na:tapo wua: malapame na: mate Apolos mate di koko tle wua: dla imalepo, wua:tapo God yu bukata atla mate ala:po ha:ha:mama wua: dokopala so yilo wua: dulu dla hukulli pa:po ha:ha:lepo depame.

<sup>7</sup> Wua: adipalati wuskamu di dla halopo

hehetamha:ha:ma:? Epame wua: koko adiyeye God tle pahalalo wekuwa? Amasiyama Godtapo isikimi ya:ta namkale dle tle wua: dla koko hapulomaye ma-halopiwapo. Ame epapele dulu dla wua: adipalati God tle koko opi pahalomalalo wekele some ma wuskamu di dla halopo hehetamha:ha:ma:?

<sup>8</sup> Wua:ta malamaletapo wua:ye koko hapuloma mo-malastale so demha:ha:po. Epame wua: ma wuskamu wua:ye Sokota isikimi hapimhala kokoye mo-poposatilipo ha:ha:ma demha:ha:po. Epame wua: ma dita gadle dimi dokopala hi mo-halomuwa demha:ha:po. Wua:ta epapeleta amatiye, ka:dena, na: mape dokopala hi ma halë hallemla.

<sup>9</sup> Amasiyama pona:malamana, Godtapo Taiya dle so dia:ye hohopame mosukulu alo ikadepe dla hatitimuwayo, ditapo koko gladle dla palliwedeme ha:ha: so opa epapele some ha:ha:lasiyama ta:lamo so opa hapuloma mate epo banakaka so mateta dia:ye tepelemha:ha:lepo depame.

<sup>10</sup> Keliso yilo ditapo yiyilamale so some ha:ha:lasiyama wua:ta atlemama, “dia:tlo Keliso dulu dla malamale ka:ka:dle so,” demha:ha:mdepo. Epame ditapo hopeyalimale so some ha:ha:lasiyama wua:tapo atlemama, “dia:tlo itiyamale so,” demha:ha:mdepo. Epame opata wua: tlo sikemte ka:ka:dle so demama asiyama dia:tlo allimdepo.

<sup>11</sup> Epele dulu dla di daya teta:le mate yú teta:le mate me-siyamdepo. Epame di tluka mape isikimi bobtalimale siyapo tlo didiyepo siyamdepo.

Epame opatapo dia:ye sikemte posalemdepo. Epele dulu dla dia: dla dita ha:ha:lalo aya ikadepe ma hawa.

<sup>12</sup> Epapedeme ditapo di moto mate oko pato halomdepo, dita dlowe malamama. Epame opa opita dia: dla putlopo atlamyelati asiyama ditapo yia: dla isikimi siyele yu tlo atlamdepo. Epame opa opita dia: dla wotiyalle hamilati asiyama ditapo isikimi sadle mate yu dimi ha:ha:mdepo.

<sup>13</sup> Epame yia:tapo di hi mate isikimi mala-atlamyelati asiyama ditapo isikimi yu ka:dle siyapo tlo yia: dla atlamdepo. Epame ta:lamo sotapo dia:ye hakaka demdepo.

<sup>14</sup> Epapele dulu dla na:tapo yu ilima i mate wua: dla wota:le hamilowedeme po-apesema. Amasiyama na:ta wua:ye na: yimlala ikadepe some malahalemama wua: watle molo yu atlema.

<sup>15</sup> Adipalati, pona:malamana, wua: dla Keliso koko imuwa opaye sikemte pasatale mle. Amasiyama dulu edla hatlo na:tapo wua: a halapo. Adipalati, ka:yapa na: tatlle ka:dle yu Yesu Keliso kokoye wua: dla puame imalati wua:tapo mikadepe duwapo.

<sup>16</sup> Epapedeme wua:tapo na: koko natipame dolumelepo depame na:tapo koko iye wua: dla atlema.

<sup>17</sup> Epapele koko tle na:tapo Timotiye wua: dla tane dema. Adipalati, ya:ye Keliso dulu dla ka:depo oko halalo oplamipo. Epame ya:ye Keliso dulu dla na:ta sikemte dupa ellalo maseyemala ikadepe sepena. Epedeme ya:tapo puame wua: watle na:ta Keliso dulu dla hala koko mate epo mikadepe dle so hapuloma dla na:ta Keliso koko

imsela: mateye wua: dla atlamelepe.

<sup>18</sup> Epedeme wua: dulu dla opa opitapo na:ye ma ilame edla populalo wekelepe depo malapame yiskamu di dla halopo hehetamyapo.

<sup>19</sup> Amasiyama Lodtapo na:ta wua: hala dla tlow-eye ka:dena dlepiye, eta na:ta ma-hapele wua: hala dla tlowepo. Amasiyama na:ta pulupiye, na: posolotamasema, isikimi yia:ta atlama yu siyapo tlo dallowe, amasiyama na: solotama, opa ewolota yiskamu di dla halopo hehetamama itiyamale halopo ha:ha: kokoye woloma natilowepo.

<sup>20</sup> Adipalati, God ya: mo kokoye isikimi opata atlamde yu tama di dla pohalasema. Amasiyama itiyamale tama di dla halapo.

<sup>21</sup> Epapedeme na:ta wua: hala dla puluwe dla wua: apa solotama:? Na:ta pumama bulukupi mate hampupa:, o isikimi bokotiyapo malamale mate sadle mate pupa:?

## 5

*Opa mate wola: mate uhalowe koko dla molo atlale*

<sup>1</sup> Epedeme wua: dulu dla opa mate wola: mate uhalomolowe kokota eluwo demdiye, na: me-dalemde. Koko hema oplami hale wua: dulu dla hallalotapo ya: a ya:llu kolahame halaye pta koko batalimana. Ipapele kokoye God yeitamale sota pohalalo wekemde tlo, ma adipammama mikadepe dle oplamita koko iye hama:?

<sup>2</sup> Epame wua: adipalati ipapele kokoye me-natipame ma wuskamu di dla halopo hehetamha:ha:ma:? Amasiyama wua: ipapele koko natipame dupa kolemana epapele oplamiye



aseka sos tle alikili dla hallepo depame ya: hi geda:dlowe ka:pi.

<sup>3</sup> Epedeme wua: malamaiya, na:tapo na: moto ikadepe mate wua: mate pohalasema. Amasiyama na:tapo soko tle wua: mate halapo. Epedeme batalimale koko halalo oplami e ya: kokoye na:tapo ma-gladuwapo.

<sup>4</sup> Epapedeme wua: ka:dena, koko hema yimkata Lod Yesu hi tle alupame esemale haiya. Epalati na: mape soko tle wua: mate alumale dulu edla hallowepo. Epame Yesu Kelisota itiyamale ma wua: mate me-hallepe.

<sup>5</sup> Epame wua:ta esemale dulu edla wua: oplami eye hampame ya: dla mota solotamale koko elaye yulupo depame Saiten do tama dla homeleiya. Epelepiye, eta ya:ta ya: batalimale tle ma mala-male meyelope dlati asiyama Lodtapo ya:ta puluwe alila dla ya: pasakalo gadlepe.

<sup>6</sup> Wua:tapo wuskamu di dla halopo hehetamha:ha:ye pta batalimana. Epele dulu dla powua:malamata:, yist alisisi yemalatapo palawa daya dla goudepo dukumalati dayata di a:ma hetamdepo. Epammama oplami hatlota batalimale koko hamhallati pohumatlalo me-omha:ha:lepiye, wua:ta hapulomatapo batalimale koko hatlo medla tutula:lepe.

<sup>7</sup> Epapedeme wua:tapo woloma ka:depo ha:ha:lowedeme wua: dulu dla batalimale koko halalo oplami halaye alikili dla holamastaiya. Adipalati, Kelisoye yumulati dia: yilo mo-pouwapo.

<sup>8</sup> Epapedeme di ka:dena, batalimale koko mate epo poka:ka:dle koko mateye alikili dla

pololepame ma ullu pa:le koko mate epo ikadepe koko mate dulu dla ha:ha:loweye.

<sup>9</sup> Na:tapo ka:yapa wua: dla yu ilipo hamiwa dulu dla wua:ye ma-atlamuwapo, wua:tapo wola: mate epo opa mate uhalomalalo so mate hatlope demha:ha:lala depame.

<sup>10</sup> Epele dulu dla na:ta atluwaye, alikili sota wola: mate opa mate uhalomde koko dla atlemama po-apena. Epame yia:ta mani mate alisisi mate sikemte solotamde koko dla atlemama po-apena. Epame yia:ta biskapa god dla sisiyemde koko dla atlemama po-apena. Amasiyama isikimi mikadepe dle so opita batalimale ipapele koko dulu dla ha:ha:la natipame atlemama apuwapo. Epele dulu dla na:tapo wua:ye alikili so ipapele mate hatlope demha:ha:miyo dematiye, mikadepe dle so wua:ye hadima tame ha:ha:lemo? Adipalati, ta:lamo pato iye alikili so epapele sota pasatepo elapo.

<sup>11</sup> Amasiyama na:tapo wua: watile yu ilipo hamiwa ya: dulu kokoye ipo elema. Oplami haletapo ya:skamu ya:ye mikadepe dle oplami depame matle batalimale koko ipapele halomhalemama matle ya:mkale putlomolowe koko mate epo kawata yú sikemte dlowe koko mate epo uhalowe koko mate halomhallepiye, epapele mate hatlope demiya.

<sup>12-13</sup> Epedeme alikili so koko gladloweye pona: koko. Adipalati, hatlo Godtapo yia: kokoye gladlepe. Amasiyama mikadepe dle so alumale wua: dla itiyamale elapo, wua: dulu dla oplami haleta batalimale koko halati ya: koko gladloweye. Adipalati, God yu bukata epo atlapo,

“Batalimale koko halomalalo oplami wua: dulu dla halaye alikili dla dodolomaiya,” depo.

## 6

*Wua: amkadulo mikadepe dle soye eleme koko gladle dla tlowe*

<sup>1</sup> Epedeme mikadepe dle so wua: dulu dla oplami haletapo ya:mkale mate yu topulolepame ma adipalati koko eye hame alikili so koko gladlalo so dla koko gladla tamdi? Amasiyama wua: isikimi ka:dena, mikadepe dle so siyapota koko i ka:dloweye.

<sup>2</sup> Adipalati, wua: powua:malamata:, mikadepe dle so ditapo ta:lamo pato i ya: koko gladloweye? Epapedeme ta:lamo pato i ya: kokoye mikadepe dle so ditapo gladlepe dedeme, wua: ka:dena, wua: dulu dla yimka:sikili koko i tatile woloma ka:pi glademha:ha:iya.

<sup>3</sup> Epame wua: ma powua:malamata:, mikadepe dle so ditapo God ya: banakaka so koko gladloweye? Epapedeme di ka:dena, dita ha:ha:le dulu dla yimka:sikili koko woloma ka:ka:demha:ha:loweye.

<sup>4</sup> Epapele dulu dla yu topulolle kokota wua: dulu dla woyamalati natipame koko eye ka:dloedeme wua: ma adipalati alikili so koko gladlalo so dla tamdi?

<sup>5</sup> Wua: wowota:lowe ka:pipo. Adipalati, mikadepe dle so wua: dulu dla ka:dle oplami hale hawata:, wua: koko gladloweye?

<sup>6</sup> Amasiyama mikadepe dle oplamitapo ya:mkale mikadepe dle oplami haleye seme koko

gladlowedeme ma alikili so koko gladlalo so hala dla tamdepo.

<sup>7</sup> Wua: dulu dla koko gladle hutiyetapo wua:ta mikadepe dle kokota mo-powale some elaye nati-ipo. Epedeme wua: poka:deta:, oplami hale-tapo wua: dla batalimale koko hale halati isikimi natipo emolloweye? Epame wua: poka:deta:, oplami haleta wua: alisisi uhalati isikimi natipo emolloweye?

<sup>8</sup> Epele tlope muwolo yimkadulo dla batalimale koko halopame ma yia: alisisi uhalomdepo. Wua:ta epamha:ha:mama wua: amkadulo mikadepe dle so dla ma mepamdepo.

<sup>9</sup> Epapedeme wua: powua:malamata:, batali-male koko halomalalo sotapo God ya: mo koko dla po-u-ulapo tulalo wekeloweye? Wua: koko iye woloma malamaiya. Adipalati, opa mate wola: mate uhalomalalo so mate, epo biskapa god dla sisiyelalo so mate, epo opa yimkadulo halomalalo so mate,

<sup>10</sup> epo yimkadulo alisisi uhalomalalo so mate, epo alisisi mate mani mate sikemte solotamalalo so mate, epame kawata yú sikemte dlalo so mate, epo yimkadulo dla putlopo atlamalalo so mate, epame isikimi elemale tle yimkadulo alisisi halo-malalo so mateye God ya: mo koko dla po-u-ulapo tuluwa.

<sup>11</sup> Opi wua:ye ipapele koko dulu dla ha:ha:uwapo. Epapele tlope watapo di Lod Yesu Keliso hi tle epame God ya: Sokota itiyamale tle batalimale hapuloma eye wua: tle mo-howahalomuwapo. Epedeme Godtapo wua:ye ya: mila:pi tle mo-ullu pa:talo so depame ma ya:

opa duwapo.

*Wua: motota koko halë tle God dla siyele hamiya*

<sup>12</sup> Epedeme wua: dulu dla opitapo epo atlemdepo, “Dia: dla koko hapuloma halomolowe dla aiyalma hawa,” demdepo. Amasiyama na:ta wua:ye atlema, koko opi wua:ta halomolowe ye wua: dla pase ka:pi. Epame koko haleta wua:ye dea some popoliyepo dokopala depo hallowe ye poka:dena.

<sup>13</sup> Epame opita ma epo atlemdepo, “Dlowe alisisiye di koko tetepo epame asiyama di kokoye dlowe alisisi tetepo,” demdepo. Amasiyama koko dapiyamte hema Godtapo mosukulu alila dla batalipo hamastlepe. Epedeme di motoye opa mate wola: mate uhalomha:ha:lowe dla pomita:pena. Amasiyama Lod tete depame mimita:puwapo. Epame asiyama Lod mape di motoye omhalapo.

<sup>14</sup> Epapedeme Godtapo ya:ta itiyamale tle Lodye powale dulu tle ma pasakalo duwapo. Epedeme ma hatlo ya:tapo dia:ye powale dulu tle ma pasakalo dlepe.

<sup>15</sup> Epame powua:malamata:, wua: moto hapulomaye Keliso moto ipipo? Epapeleye ma ka:deta:, oplamitapo ya: motoye Keliso dulu tle hapame ma duka dla sela:lalo a:ya mate hatlope dlowe ye? Hao, poka:dena.

<sup>16</sup> Epedeme powua:malamata:, oplamitapo isikimi duka dla sela:lalo a:ya mate hatlope dlepiye, yia:ta dapiyamtetapo moto ma-hatlope depo? Adipalati, God yu bukata epo atlapo, “Oplamitapo a:ya halepiye,

ya:ta madipatatapo moto ma-hatlope depo halapo.”

<sup>17</sup> Amasiyama oplami antapo Lod dla tame ulupo halema:, ya:ye Soko tle ya: mate ma hatlope depo halapo.

<sup>18</sup> Epedeme wua:ye opa mate wola: mate uhalomolowe batalimale koko tle alikili dla potaiya. Adipalati, batalimale koko opi hapulomatapo wua: motoye pobatalimasemde. Amasiyama opa mate wola: mate uhalowe koko etapo wua: moto dla batalimaleye hampumdepo.

<sup>19</sup> Adipalati, powua:malamata:, wua: motoye God ya: Hela:dle Sokota hallalo ayapo? Godtapo ya: Hela:dle Sokoye wua: watle ma-hamiwapo. Epedeme Hela:dle Soko etapo wua: dulu dla halapo. Epapedeme wua:ye wuskamu muwolo wua: motoye po-omha:ha:sema.

<sup>20</sup> Adipalati, Godtapo wua:ye asiyama pato mate me-elemuwapo. Epapedeme dita di moto mate koko halomdetapo God dla siyele hamilowe tlo ka:pi.

## 7

### *Oplamita ya:llu mate hallowe koko*

<sup>1</sup> Epedeme wua:ta na: watle yu ilipo hamimama atlanatiwaye, na: wata koko edla asiyama yuye wua: dla atlowe solotama. Yao, oplamitapo isikimi a:ya pahalalo hallowe tlo ka:pi.

<sup>2</sup> Amasiyama epapele tope wua:ta opa mate wola: mate uhalowe batalimale dla tullala depame wua: ka:dena, oplamitapo woloma ya: a:ya hatlo tlo hapo halloweye. Epame a:ya mape ya: oplami hatlo tlo hapo halloweye.

<sup>3</sup> Epo ha:ha:le dulu dla a:yatapo ya:wolali mate hatlope dlowe solotamelepiye, ka:dena, oplamitapo ya:llu yu dla salladloweye. Epame ma asiyama oplamitapo ya:llu mate hatlope dlowe solotamelepiye, ka:dena, ya:llutapo ya:wolali yu dla salladloweye.

<sup>4</sup> Adipalati, a:yaye ya:wolali tetepo. Epedeme ya:tapo ya:skamu ya: motoye po-omhalasema. Amasiyama ya:wolalita omhalapo. Epame asiyama oplami mape ya:llu tetepo. Adipalati, ya:tapo ya:skamu ya: motoye po-omhalasema, ya:llutapo omhalapo.

<sup>5-6</sup> Epedeme wua:ta madipata ha:ha:mama hatlope demha:ha:loweye melemiya. Amasiyama wua:ta God dla inoma sumha:ha:lowedeme wua:ta madipatata hatlope demde koko dla esepame solotamale himpo alila kiyele dla aiyalma depo ha:ha:lowa dlepiye, e ka:pipo. Amasiyama koko hema na:tapo wua:ta epapelepo depame wua:ye poha:ha:masema. Epame wua:ta aiyalma depo ha:ha:le kokota mo-puame gudlepiye, eta ma wua:ta madipatata ma-hatlope demha:ha:lowe ka:pipo. Adipalati, wua:ta madipatata ma pohatlope dlalo ha:ha:lati Saitenta wua:ye elemala natimama opa mate wola: mate uhalowe koko dla elementullala.

<sup>7</sup> Isikimi na:ta malamale dla ipo elemde, opa hapulomatapo na: some wola: pahalomalalo ha:ha:lepo depame. Amasiyama Godtapo opa opi dla wola: halomolowe malamaleye hapimhalapo. Epame ma opa opi dla wola: pahalomalalo isikimi mepo ha:ha:lowe malamaleye hapimhalapo. Epame wola: dla mape mepapena.

<sup>8</sup> Epame na: ma watapo wola: mate opa mate pohalomalalo wekele so wua: dla epo dupulapitalo so wua: dla yu i atlema. Ka:dena, wua:ta na: some wola: mate opa mate pohalomalalo ha:ha:loweye.

<sup>9</sup> Amasiyama epapele dulu dla wua:tapo wola: mate opa mate uhalomolowe batalimale koko dla tulluwe dla pokokalepo ha:ha:lalo wekelepiye, eta wua: ma ka:dena, opa mate wola: mate halomoloweye. Adipalati, oplamitapo a:ya pohalalo halemama isikimi a:ya hapo hallowe koko tlo sikemte momalamhalloweye e poka:dena. Amasiyama epapele kokota woyamalala depame oplamita a:ya hapo hallowe tlo ka:pipo. Wola: mape koko ma hatlopepo.

<sup>10</sup> Na: ma wola: mate opa mate ma-halomale abili so wua: dla yu iye atlema. Amasiyama yu iye pona: yu ikadepe. Adipalati, Lodtapo meyelo epo atluwapo, “A:yatapo ya:wolaliye pomeleme tlowa,” duwapo.

<sup>11</sup> Amasiyama ya:tapo mepele ya:wolaliye meleme telepiye, ya: ka:dena, oplami ma pohalalo mepo isikimi polloweye. Epapele dulu dla ya:tapo isikimi mepo pollowe koko dla woloma pomalamalalo wekelepiye, ya: ka:dena, ma ilame tame ya:wolali mate hatlope dlowedeme esemelepe. Epame opa mape poka:dena, yia: wola: salepo tloweye.

<sup>12</sup> Epapedeme Lodta atlale yu ipi hema na: mape na:ta malamale kokoye wua: dla atlowe solotama. Mikadepe dle oplami hale ya:llu pomikadepe dletapo ala ya:wolali mate me-hallowe solotamalati asiyama ya:wolalitapo ya: meleme tlowe poka:dena.



<sup>13</sup> Epame ma mikadepe dle a:ya mape mepa-pena. Ya:wolali pomikadepe dle oplamitapo ya: mate me-hallowe solotamalati asiyama ya:llutapo ya: meleme tloweye poka:dena.

<sup>14</sup> Adipalati, pomikadepe dle oplamiye, ya:lluta mikadepe dle koko tle ya:ye God mila:pi tle ullu pa:le oplami some halapo. Epame asiyama pomikadepe dle a:ya mape, ya:wolalita mikadepe dle koko tle ya:ye God mila:pi tle ullu pa:le a:ya some halapo. Koko ita pe-epo ellalo wekematiye, wua: yimlalata God mila:pi tle ullu watalo so some ha:ha:lemla. Amasiyama yia:ye God mila:pi tle mo-ullu pa:le so depo ha:ha:po.

<sup>15</sup> Amasiyama wa: a:ya pomikadepe dlalo wekele epapeleta o wa: oplami pomikadepe dlalo wekele epapeleta wa:ye meleme tlowe solotamelepiye, ka:dena, ya: watle me-tane dlepe. Adipalati, ipapele koko dulu dla aiyalma haleta pe-elasema. Amasiyama Godta solotamapo, wa:tapo woloma sadle dulu dla hallepo depame.

<sup>16</sup> Epedeme a:ya, Godtapo wa: tle wa:wolali pasakalo gadlowedeme halaye wa: adipo malapa:? Epame oplami wa: mape, Godtapo wa: tle wa: a:ya pasakalo gadlowedeme halaye wa: adipo malapa:?

*Godta wua: hadima ha:ha:lati sisilamuwa pasakalo dulu medla mepo ha:ha:iya*

<sup>17</sup> Epedeme ka:dena, opa hapulomatapo Godta yia: watle hapili pasakalo e mate ha:ha:loweye. Epame wua:tapo Godta ka:yapa wua: sisilamale oloma edla wua:ta ha:ha:uwaye epo ha:ha:iya.

Epedeme koko hatlo iye na:tapo mikadepe dle so hapuloma dla imsela:po.

<sup>18</sup> Wa: ala pomikadepe dlalo halemama kapala ma-kestauwayo, epapeleye wa: matle mikadepe depo halemama wa:ta kapala kestauwa eye ma meyelope demiya. Epame wa: ala kapala pokestlalo halemama mikadepe duwayo, wa: matle kapala kestamiya.

<sup>19</sup> Adipalati, kapala kestlowe koko mate epo kapala pokestlalo wekelowe koko mateta koko pato pohalasema. Amasiyama isikimi Godta molo atlale yu dla dolumhallowe tlo koko patopo.

<sup>20</sup> Epedeme Godta ka:yapa wua: sisilamale oloma edla wua:ta ha:ha:uwaye mepo ha:ha:iya.

<sup>21</sup> Godta wa: sisilamuwa oloma edla wa:ye asiyama pa:le dla oko halalo oplami some haluwayo. Wa: ase malamiya, aseka medla mepo halane. Amasiyama medla me-halemama wa:ta alikili a:ma dla woyamolowe api natilipiye, wa: api etle tane.

<sup>22</sup> Lodtapo asiyama pa:le dla oko halomalalo so sisilamale oloma edla yia:tapo Lod dulu dla ma asiyama pa:le dla oko halomalalo so some poha:ha:sema. Amasiyama asiyama pa:le dla oko pohomalalo wekelalo soye Lodta yia: sisilamale oloma dla ma asiyama yia:tapo Keliso dulu dla asiyama pa:le dla oko halomalalo so some ha:ha:po.

<sup>23</sup> Godtapo wua:ye asiyama pato mate me-elemuwapo. Epedeme ta:lamo kokota wua:ye el-empta demiya.

<sup>24</sup> Epapedeme mikadepe dle so namkadulo, Godta ka:yapa wua: sisilamuwa oloma edla wua:ta

ha:ha:uwaye, God mila:pi tle ma mepo ha:ha:iya.

*Opa mate wola: mate halomolowe koko*

<sup>25</sup> Lodtapo na: wadle amkoteta:le sota wola: mate opa mate halomolowe dla yu hale po-atlana. Amasiyama wua: dla isikimi na:tapo molo yu atlowepo. Epele dulu dla wua:tapo na:ye mikadepe diya. Adipalati, Lodtapo na:ye gadle tle malamale ka:dleye na: wadle ma-hamiwapo.

<sup>26</sup> Epedeme di wata oloma hema ta:lamo kokalalimale koko dulu dla ha:ha:deme na:ta wua: dla atlema, wua:ta ha:ha:ye mepo ha:ha:iya.

<sup>27</sup> Epedeme wua: opa mate epo wola: mate ma-halopo ha:ha:yo, mepo halopo ha:ha:iya. Amasiyama opi wua: ala wola: mate opa mate pahalomalalo ha:ha:yo, wua: mape mepo meha:ha:iya.

<sup>28</sup> Amasiyama epele dulu dla wa:tapo a:ya hali dlepiye, eye pobatalimale koko. Epame ipi-lalotapo oplami hali dlepiye, e mape pobatalimale koko. Amasiyama na: solotama, opata wola: halopo ha:ha:mama upiyele koko opi tlamdiye, wua:ta koko e potlamalalo wekelepo depame wua:ye gadema.

<sup>29</sup> Epedeme mikadepe dle so namkadulo, Yesuta puluwe alilatapo mo-kiyempulati na:tapo wua: dla yu ipo atlema. A:ya ma-halë oplamitapo God oko tlo sikemte malamama a:ya pahalalo wekele some hallowe ka:pi.

<sup>30</sup> Epame siyele koko mate epo dupa kolle koko mate epo alisisi pasatepo hallowe koko matetapo oplamita God oko halowe dla api himomollowe poka:dena.

<sup>31</sup> Epedeme dita ta:lamo hema ha:ha: oloma dla koko hapuloma halomha:ha:tapo oplamita God oko halowe dla api himomolloweye poka:dena. Adipalati, ta:lamo pato i mate epo dulu edla ha:ha: alisisi mateta pa:loweye mo-mateka:pi halapo.

<sup>32</sup> Na: posolotamasema, wua:tapo koko hapuloma dla sikemte momalamale mate ha:ha:loweye. Adipalati, a:ya pa:le oplamitapo isikimi hatlo Lod oko hamhalemama ya: dla siyele hamilowe koko tlo sikemte momalamhalemdepo.

<sup>33</sup> Amasiyama a:ya walle oplamitapo ya:llu mate epo yimlala mate gadlowe koko tlo momalam-sela:mama ya:llu dla siyele hamilowe koko ma sikemte momalamhalemdepo.

<sup>34</sup> Epammama ya:tapo momalamale dapiyamte dla tatlapo halemdepo. Malamale haleye ya:llu dla siyele hamilowe kokopo, epame haleye Lod dla siyele hamilowe kokopo. Epame wola:mape mepamdepo. Sote popa:lalo wola: mate epo ipilatalo matetapo woloma God okoye ka:pi halowe tlo momalamdepo. Adipalati, yia: solotamdepo, yia:tapo God oko hamama yia: moto tle epame yia: soko tle aiyalma depo ha:ha:lowedeme. Amasiyama oplami walle a:yatapo isikimi ya:wolali mate yimlala mate gadlowe koko tlo momalamhalemama ya:wolali dla siyele hamilowe koko ma sikemte momalamhalemdepo.

<sup>35</sup> Na:ta koko i atla dulu dla wua:tapo opa mate wola: mate halomolowe koko dla pohumat-lasema, asiyama na:tapo isikimi wua:ye gademama amma. Adipalati, na: solotama, wua:tapo Lod dulu dla woloma ka:depo ha:ha:mama hatlo

ya: tlo sikemte momalamha:ha:lepo depo amma.

<sup>36</sup> Epele dulu dla wa:tapo ipilalo hale halowe dla yu himme halayo. Epame wa: mape a:ya e halowe dla sikemte solotamale ellepiye, ka:dena, wua:ta madipatata me-halomoloweye. Adipalati, edla batalimale koko hale pe-elasema.

<sup>37</sup> Amasiyama wa:ta malamaleta mowolo a:ya dimi hallowe kokoye ka:pi depo malapame ma wa:skamu wa: moto hamolowe ma ala:le hallepiye, ka:dena, wa:tapo wa: watle a:ya hamilowa depo yu me-himpo ha:ha:leye ma memellepe.

<sup>38</sup> Epapele dulu dla wa:ta a:ya haloweye ka:dle kokopo. Amasiyama wa:tapo a:ya dimi isikimi mowolo hallowe tlo sikemte ka:dena.

<sup>39</sup> A:yatapo ya:wolalita ala me-hallati ma oplami hale haloweye poka:dena. Amasiyama ya:wolalita mo-polati ma oplami hale halowe solotamelepiye, ka:dena, ya:tapo ma oplami hale hamama isikimi mikadepe dle oplami halowe tlo ka:pi.

<sup>40</sup> Amasiyama na:ta malamale dla ipo elema, a:ya eta ma isikimi siyele mate halli dlepiye, ya: ka:dena, matle oplami hale pohalalo mepo poloweye. Na: mikadepe demama God Soko tle koko iye atlema.

## 8

*Biskapa god dla namkale dle alisisi hapili dlowe koko*

<sup>1</sup> Epedeme di ma watapo dlowe alisisi biskapa god dla namkale dle hapimde koko dla

malamolowepo. Dita hapuloma koko iye maldimalamale tope, asiyama malamale kokotapo diskamu dia: dla di dla halopo hetlowe kokoye hampumdepo. Amasiyama bokotiyapo malamale kokotapo isikimi yimkadulo gadlowe kokoye hampumdepo.

<sup>2</sup> Epapedeme ya:skamu ya: tlo koko hapuloma sikemte malamana dlalo oplamiye, koko hapuloma dulu dla sikemte yeliyele oplamipo.

<sup>3</sup> Amasiyama God sikemte malahallalo oplamiye, Godtapo ya: kokoye malastepo halapo.

<sup>4</sup> Epedeme biskapa god dla namkale dle alisisi hapili dlowe kokoye ipo elema. Dimalamana, biskapa god hapulomaye pogod ikadepe. Adipalati, di God hatlota halapo, god opi hawa ikadepe.

<sup>5</sup> Epapele tope pomikadepe dlalo wekele so opatapo pepele di dla ha:ha:lalo alisisi opi mate epo ta:lamo dla ha:ha:lalo alisisi opi mate semama god demdepo.

<sup>6</sup> Amasiyama dimalamana, di A God hatlota halapo. Epedeme hatlo ya:tapo koko hapulomaye mimita:puwapo. Epedeme ditapo hatlo ya:yilo ha:ha:po. Epame Lod mape hatlo Yesu Kelisopo. Godtapo hatlo ya: tle koko hapulomaye mimita:puwapo, epame ya: tle di watle pasakalo hamiwapo.

<sup>7</sup> Epapele dulu dla mikadepe dle so opitapo koko iye woloma sikemte pomalastepo ha:ha:sema. Adipalati, yia:tapo biskapa god opiye semte god ikadepe tepo demdepo. Epammama yia:tapo biskapa god dla namkale dle alisisi hapili halopo

demama semte batalimale koko hamapo depame sikemte wowota:mdepo.

<sup>8</sup> Amasiyama dlowe alisisitapo dia:ye God hala mateka:pi dla pe-elempuasemde. Epedeme ditapo dlowe alisisi dlomde kokotapo dia:ye God mila:pi tle po-ullu pa:talo so desemde. Epame ma dita dlowe alisisi e podlalo wekelati mape eta dia:ye God mila:pi tle po-ullu pa:talo so desemde.

<sup>9</sup> Epedeme wua: tlo wua:malamana, wua:tapo biskapa god dla namkale dle alisisi hamili e dlowe dla aiyalma hawa kokoye. Amasiyama wua: alisisi e dlomha:ha:mama wolomape. Adipalati, wua:ta epamde kokotapo mikadepe dle so opi pase kokalalimale so yia:hete kustame tlalo alisisi some hallala. Adipalati, yia:tapo ipapele alisisi dloweye semte aiyalma tepo demdepo.

<sup>10</sup> Epapedeme wua: natiya. Wua:tapo biskapa god dla sisiyelalo aya dulu dla epapele daya dempopa:lati mikadepe dle dulu dla pase kokalepo ha:ha:lalo sota wua:natipame yia:ta malamaleta wua:ye batalimale koko hama dlepe. Asiyama wua:tapo yia:ta aiyalma dlalo koko tlo ma medlomala natimama yia: ma medlomalala.

<sup>11-12</sup> Amasiyama wua:ta epapele koko halë tle mikadepe dle dulu dla pase kokalalimale sota mikadepe dleye mo-bobtalimdepo. Epapedeme wua:tapo yia:ye batalimale koko dla me-eleme tulumdepo. Adipalati, yia:tapo wua:koko natipame dolumama ma yia:ta aiyalma dlalo kokoye ma mehalomdepo. Wua:ta epamde koko tle wua:tapo Keliso dla mo-batalimale koko hamdepo. Adipalati, Kelisotapo yia:yilo pouwapo.

<sup>13</sup> Epapedeme na:tapo ipapele daya dele koko

tle namkale mikadepe dle dulu dla pase kokalle oplami batalimalala depame na: matle ipapele daya podemhallowa.

## 9

*God oko halalo sota yia: oko asiyama halowe koko*

<sup>1</sup> Epedeme na: dla itiyamale pe-elema:, na:ta wua: dla yu ipo ilipo hamiloweye? Epame na:ye potane dle oplamita:? Epame na: mape di Lod Yesu ponatilalo wekele oplamita:? Epame pona:ta:, wua: yilo oko pato hauwaye, wua:ta mikadepe dlepo depame?

<sup>2</sup> Epele dulu dla opa mo opi dla ha:ha:lalo so-tapo na:ye potane dle oplami dlepiye, asiyama wua:tapo na:ye tane dle oplami ikadepe dlowe ka:pi. Adipalati, wua:tapo na:ta Lodta tane dle oko hauwa e ya: ulu ha:ha:po.

<sup>3</sup> Epapedeme opa opitapo na:ta tane dle oko hamsela: itiyamale dla na: watile atlanatimde dla ya: asiyama yuye wata atlowama.

<sup>4</sup> Epedeme wua: malamaiya, na: mate Banabas mate dita di oko asiyama dla daya mate yú mate dlomha:ha:loweye poka:deta:?

<sup>5</sup> Epame ditapo di wola: mikadepe dle so mate yimkata siyamoloweye poka:deta:? Adipalati, Taiya dle so opi mate epo Yesu ya: eidulo mate epame Pita mate mape yia: wola: mate me-siyamdepo.

<sup>6</sup> Hatlo dita madipata Banabas mateta diskamu di gadlowe alisisi yilo bidulo di do mate oko hamha:ha:pa:?



<sup>7</sup> Epedeme wua: natiya, opahale dla tlalo oplamitapo ya:skamu ya:oko asiyamaye hamipa?: Epame alisisi emalalo oplamitapo ya:ta emale alisisi hauwalepo puame ma alisisi eye podlalo wekemdi? Epame halo omhallalo oplamitapo ya: aliya sumpo ma mo eye podlalo wekemdi?

<sup>8-9</sup> Epedeme koko iye na:tapo isikimi opata malamale tle po-atlasema. Adipalati, Mosesta aiyalma hatitimale mape epo atlapo,

“Wua: bulumkiyawa aliyata oko hamsela:mama daya dlala depame ya: matiye deata ke-topolomiya,” depo.

Epedeme Godtapo yu i atluwaye, ya: isikimi bulumkiyawa aliya tlo sikemte malamama apuwa?

<sup>10</sup> Hao. Ya:tapo di kokoye atlemama apuwapo. Adipalati, osalo dla oko halalo sotapo yia: osalo tle dlowe alisisi hauwalemkiye, epammama ka:dena, God ya: oko so mape yia: oko asiyama halomha:ha:lepe.

<sup>11</sup> Epedeme ditapo wua: dulu dla Soko kokoye memuwapo. Epele dulu dla poka:deta:, asiyama wua:tapo dia:ye alisisi mate gadloweye?

<sup>12</sup> Epame wua:tapo wua: dla God yu atlamalalo so opiye gademde dlepiye, ame poka:deta:, wua:tapo ma di gadloweye?

Amasiyama ditapo wua: dla alisisi opiye potomdena. Adipalati, di posolotamdena, epapele kokotapo wua:ta ditapo ka:dle yu Keliso koko atlati dalla allilala depame. Epapalala depame ditapo kokalle koko dulu medla ha:ha:loweye po-allimdena.

<sup>13</sup> Epame wua: ma powua:malamata:, opata God dla namkale dle alisisi hapili alisisiye, yo Yu so

aiyalma aya dulu edla oko halalo sotapo demduwapo. Adipalati, eye yia: oko asiyamapo.

<sup>14</sup> Epapedeme Lodtapo itiyamale yu mate epo atluwapo, mikadepe dle sotapo God yu atlamalalo soye asiyama gademha:ha:lowe ka:pi.

<sup>15</sup> Amasiyama epapele tlope na:tapo asiyama halowe yilo God oko pohamsela:na. Epame ma na:tapo wata oloma itle na: oko asiyamaye mikadepe dle so tle hamsela:lowedeme yu iye polimasema. Epele dulu dla na: siyema. Adipalati, na:tapo asiyama yilo God okoye pohamsela:na. Amasiyama oplami haletapo na:ta asiyama pa:le God oko hamsela: hema natipo alimama na: api himomellepiye, na: asiyama isikimi polowe tlo solotama.

<sup>16</sup> Epedeme na: dla na:ta God yu atlamsela:mde koko dla naskamu di dla pohamhetlowa. Adipalati, ka:dle yu hame opa dla atlamsela:loweye Godtapo na: watle hamiwapo. Epapedeme na:tapo God yuye opa dla woloma po-atlemsela:lalo wekelepiye, na: ya:mkale! Na: pasakaloye batalimelepe.

<sup>17</sup> Epele dulu dla na: monolo solotamale tle ka:dle yuye atlemsela:matiye, eta na:tapo na: oko asiyamaye hamsela:lemla. Amasiyama Godtapo meyelo na:ye sepame oko iye hamiwapo, pona:ta solotamale tle.

<sup>18</sup> Epedeme na: oko asiyamaye apata:? Na: oko asiyamaye na:tapo opa dla ka:dle yuye asiyama dimi isikimi atlamsela:ta na: dla siyele hampuluwe kokopo.

<sup>19</sup> Epedeme na:ta oko hamsela: dulu hema opata na:ye dokopala depo pahalasema. Amasiyama

epapele tlope na:tapo opa hapulomaye Keliso hala dla elemtlowedeme yia: yu dla salladepo sela:po.

<sup>20</sup> Epapedeme na:ta Yu so mate halemama Yu sota ha:ha:mde kokoye natipame na: mape yia: some halemduwapo, na:tapo yia:ye eleme Yesu hala dla puluwedeme. Epele dulu dla yia:ta Mosesta aiyalma hatitimale dulu dla ha:ha:lali asiyama na: tlo aiyalma dulu edla pahalana. Amasiyama na:tapo yia:ye Yesu hala dla eleme puluwedeme na: mape yia: some aiyalma dulu dla hallalo oplami some halemduwapo.

<sup>21</sup> Epame na:tapo po-Yu so mate halale dulu dla mepamduwapo. Yia:ye Mosesta aiyalma hatitimale kokoye yeitamana. Epedeme na: mape yia: mate mepo aiyalma koko yeliyele oplami some halemduwapo, yia:ye Keliso hala dla eleme puluwedeme. Amasiyama epapele dulu dla na:ye ikadepe aiyalma pa:le dulu dla pahalasema. Adipalati, na: mape Keliso aiyalma dolumalalo halapo.

<sup>22</sup> Epame na:tapo mikadepe dle dulu dla pase kokalalimale so mate halale dulu dla na: mape yia: some halemduwapo, yia:ye Keliso hala dla eleme puluwedeme. Epapedeme na:tapo opa hapuloma yilo koko hapuloma iye halomsela:mduwapo, na:ta yia:ye Keliso hala dla eleme puluwedeme.

<sup>23</sup> Epapedeme na:ta ka:dle yu yilo koko hapuloma iye halomhalapo. Adipalati, na: ma solotama, ka:dle yuta hampua koko ka:dle e halowedeme.

<sup>24</sup> Ame adipalati, wua: malamaiya, opa hapulomata ullumtale dulu dla isikimi oplami hatlota tla:mtapame asiyamaye hamdepo. Epapedeme

wua: mape, wua:ta ullumtale dulu dla isikimi tla:mtlowa depo malamale mate ullumtaiya.

<sup>25</sup> Epedeme ullalo sotapo ulluwedeme ka:yapa atotomala natili dulu dla ha:ha:mama oko pato hamdepo, pakasiya pa:lalo asiyama alisisiye halowedeme. Amasiyama dita ullumta iye kokó elepo ellalo asiyama alisisi halowedeme apopo.

<sup>26</sup> Epapedeme na:tapo isikimi yeliyepo pokukulumtasema. Amasiyama na:tapo na:ta tlowe api itapuye woloma ma-natipame kukulumtapo. Epame na:tapo opokoko sillidle dla siyomalalo oplami some halemama na: kosele mate woloma opokoko sillidle dla siyomhalapo.

<sup>27</sup> Epapedeme opa opi dla God yu atlalo oplami na: mape alila hapuloma dulu dla na: motoye keketiyamhalapo, mosukulu alila dla na:ta asiyama haloweje batalimalala depame.

## 10

*Isael so dla woyamale kokotapo dia: dla imale koko some halapo*

<sup>1</sup> Mikadepe dle so namkadulo, na: ma posolotamasema, wua:tapo di mamadulo dla wowoyamuwa koko woweliloweje. Yia:tapo Isip mo tle alikili dla woyapame tamallati Godtapo wualaye hamiwapo, yia: eleme telepo depame. Epame ya:tapo yia:ye eleme kaula pato duka gladepame ta:la sekelle tle seme dla uluwapo.

<sup>2</sup> Epame yia:tapo wuala dolumtamalale koko mate epo kaula dulu tle tamalale koko mateta yia:ye Moses ya: alotle tlalo so duwapo.

<sup>3-4</sup> Epame yia:ta hapulomatapo yimkata Soko daya mate epo Soko yú mate dlomuwapo. Yú eye yia: mate tale Soko ewala dulu tle malemhaluwapo. Soko ewala eye Kelisopo.

<sup>5</sup> Amasiyama epapele tlope Godtapo yia: dla posiyemhalana. Epapedeme yia:tapo dalupa dulu dla me-siyamama palimpuwapo.

<sup>6</sup> Epapedeme koko hapuloma itapo dia: dla imapo, ditapo yia:ta batalimale koko halomha:ha:le eye ma dita halomolowe dla solotamalala depame.

<sup>7</sup> Epame ma ditapo yia:ta biskapa god dla sisiyemha:ha:uwa epapalala depame. Adipalati, God yu bukata epo atlapo, “Yia:tapo biskapa god dla sisiyemama daya mate yú mate dlomolowedeme popa:uwapo.

Epame ma sillipame siyaluwapo,” depo.

<sup>8</sup> Epame yia:tapo wola: mate epo opa mate uhalomha:ha:le kokoye ma dita pohalomha:ha:lowa. Adipalati, yia:tapo epamha:ha:le koko tle 23,000 opatapo alila hatlo dla paliwapo.

<sup>9</sup> Epame wua: mape Kelisoye elemala natimiya. Adipalati, yia:ta epapalati yia:ye ilamata yiyelemama palimpuwapo.

<sup>10</sup> Epame di poka:dena, isikimi alli mate ha:ha:mama yu balemha:ha:loweye. Adipalati, yia:ta epamha:ha:liti Godtapo yia: wadle polowe hampulalo banakakaye yia: dla tulune duwapo, yia: bobtalimelepo depame.

<sup>11</sup> Epedeme koko itapo yia: dla wowoyamuwapo, dia:ye imelepo depame. Epammama di ta:lamo mosukulu mateka:pi dla ha:ha:lalo

so dla molo atlale yu iye hatitimuwapo, ditapo malaha:ha:lepo depame.

<sup>12</sup> Epapedeme oplami antapo ya:skamu ya:ye kokalepo halemama batalimale koko dulu dla potulusemde dlepiye, ya:ye wolomape. Adipalati, ya: mape batalimale koko medla tullala.

<sup>13</sup> Epedeme wua: dla elemala natili koko hapulomata pumhalaye, hatlo mepapeletapo ma opa opi hapuloma dla pumhalapo. Amasiyama Godtapo wua:ta itiyamale tla:mtale elemala natili kokoye yumhalapo. Epame ma wua:ta elemala natili koko dulu tle alikili dla woyamolowe apiye ya:ta imhalapo. Adipalati, ya:tapo woloma ka:dle koko siyapo tlo halalo halapo.

*Yesu malamale daya depame epo matle biskapa god dla sisiyelowe koko*

<sup>14</sup> Epapedeme mikadepe dle so namkadulo, wua: biskapa god dla sisiyelowe koko tle alikili dla potaiya.

<sup>15</sup> Wua:ye ka:depo momalamalalo so some ha:ha:lali na:tapo wua: dla yu iye atlema. Epapedeme muwolo yu i ya: dulu kokoye hukuliya.

<sup>16</sup> Epedeme dita Lod malamale daya dele dla ditapo isilako hapo siyele yu atlepame yú dlomdetapo dia:ye Yesu omali mate hatlope demdepo. Epame ditapo matle daya hauwokokomale halopo demdeta dia:ye Keliso moto mate hatlope demdepo.

<sup>17</sup> Adipalati, ditapo daya hatlo hapame hukulupo dlomdetapo dita hapulomata Keliso moto dulu dla hatlope depo ha:ha: kokoye imdepo.

18 Epapedeme wua: ma Isalael so kokoye mala-maiya. God dla namkale dle alisisi hapili e dlo-malalo so opa hapulomatapo namkale dle alisisi e ha:lalo tile mate hatlope demduwapo.

19 Epedeme biskapa god dla namkale dle alisisi hapiloweye ka:pita:? Hao. Epame biskapa godye ikadepe godta:?

20 Hao, biskapa godye pogod ikadepe. Epapedeme na:tapo ipo atlema, namkale dle alisisi biskapa god dla hapimdiye God ikadepe dla hapi-mama po-apesemde, amasiyama bataliya watle hapimama ammdepo. Epapedeme na: posolotamasema, wua:tapo epapele koko tle bataliya yim-lala mate hatlope demha:ha:loweye.

21 Epapedeme wua: poka:dena, wua:tapo Lod malamale daya demama Lod isilako tle yú depo ma bataliya dla sisiyemama ya: isilako tle yú de demha:ha:loweye. Epame wua: ma poka:dena, wua:tapo Lod malamale daya depame matle bataliya dla sisiyemama ya: daya ma hapo de demha:ha:loweye.

22 Amasiyama dita epapele koko halomha:ha:lepiye, Lodta dia: dla elle himhallepe. Amasiyama epapele dulu dla dita itiyamale mate Lodta itiyamale mate po-ala:na. Adipalati, Lodta itiyamaleta ma-a:ma tla:mtame halapo.

*Yimkadulo dla hete kustamlalo alisisi some ha:ha:miya*

23 Epapedeme wua: dulu dla opitapo epo atlemdepo, “Dia: dla koko hapuloma halomolowe dla aiyalma hawa,” demdepo. Amasiyama epapele tlope wua:ta koko opi halomha:ha:ta

wua:ta mikadepe dle dulu dla kokalepo ha:ha:lepo depame pogadesemde.

<sup>24</sup> Epame wua: ase wua:ta solotamale koko tlo halomha:ha:miya. Amasiyama wua: amkadulo mikadepe dle so gademama yia:ta solotamale koko ma halomha:ha:iya.

<sup>25</sup> Epapedeme wua: alinepi mo mani mate halomalalo aya dla tame mo halowedeme isikimi me-halopo deiya. Amasiyama wua: mo e halomolowedeme, mo eye biskapa god dla namkale dle alisisi halopita: depame yia: dla atlanatimiya.

<sup>26</sup> Epedeme ka:dena, wua:tapo dlowe alisisi hapuloma isikimi me-halopo dlomha:ha:loweye. Adipalati,

“ta:lamo pato i mate epo dulu dla alisisi hapuloma hutiye mateye Lod tetepo.”

<sup>27</sup> Epame pomikadepe dle oplamitapo wua:ye eleme tame ya: aya dla daya dlowa dlepiye, isikimi ya: mate ya: aya dla tame dayaye me-deiya. Epame edla ya:tapo wua: watle daya hapilati asiyama wua:ta daya e dlowedeme biskapa god dla mahamita:e depame ya:ye atlanatimiya. Isikimi me-deiya. Adipalati, wua:ta epapeta batalimale koko hale pohasema.

<sup>28</sup> Amasiyama wua:tapo daya dlompopa:lati oplami haleta puame wua: watle atlemama, “wua:ta dlompopa: daya eye biskapa god dla namkale dle alisisi ma-hamina, epedeme dlomiya,” dlepiye, wua: epalati ya: malamama daya eye ma dlomiya.

<sup>29</sup> Amasiyama wua: tlo wua:malamana, wua:ta daya e dloweye. Amasiyama oplami eta mala-maletapo daya e dloweye aiyalma dlepe.



Epedeme na:ta ka:dena dlalo koko dla ma oplami haleta aiyalma hatitimolowe ka:deta:?

<sup>30</sup> Epame na:ta siyele mate ma dlalo alisisiye ma oplami haletapo aiyalma himilowe ka:deta:?

<sup>31</sup> Amasiyama wua: wolomape! Yimkadulo malamale mate koko halomha:ha:iya. Adipalati, wua:ta daya demde mate epo yú demde mate epo koko hapuloma halomde matetapo God hi di dla ta:dlowe tlo ka:pi.

<sup>32</sup> Epammama wua:ta koko halomdeta Yu so dla epo po-Yu so dla epo mikadepe dle so dla hete kustamtlalo alisisi some hala demiya.

<sup>33</sup> Epedeme na: mape mepamdepo. Na:ta koko halomdetapo opa opi dla yia: hete kustamtlalo alisisi some halloweye posolotamasemde. Ipapele koko dulu dla na: isikimi na:ta solotamale koko halowedeme po-aposema. Amasiyama opa opi gademama yia:ta solotamale koko tlo halowedeme amma, yia:tapo pasakalo gadle halepo depame.

## 11

<sup>1</sup> Na:tapo Keliso koko natipame dolumtaye, wua: ma epammama na: koko natipo dolumaiya.

*God dla siyele hamilowedeme dokopala bopudlowe koko*

<sup>2</sup> Epedeme wua:ta na:ye sikemte malaha:ha:mama na:ta wua: dla imuwa kokoye woloma ka:pi dolumha:ha:la natipame wua: dla sikemte siyema.

<sup>3</sup> Amasiyama wua: malamaiya, Kelisotapo oplamiye dokopala depo halapo. Epalati asiyama oplamitapo ya: a:yaye dokopala depo halapo.

Epame Keliso mape ya: dokopala oplamiye Godta halapo.

<sup>4</sup> Epapedeme oplami antapo opa inoma dali dla inoma sumolowedeme epo God tle yu hapame atlowedeme ya: dokopalaye bopudepo halemama apelepiye, ya:ye ya: dokopala oplami Keliso dla wota:le hamipo.

<sup>5</sup> Epame a:ya antapo inoma sumolowedeme epo God tle yu hapame atlowedeme ya: dokopalaye pobopudlalo apelepiye, ya:tapo ya:wolali dla wota:le hamipo. Adipalati, a:yatapo ya: dokopala pobopudlalo wekelowe koko mate epo kokosase tamolowe koko mate yia: dulu kokoye pomeyelo.

<sup>6</sup> Epedeme a:yatapo ya: dokopala bopudlowe allipiye, ya: ka:dena, isikimi ya: kokosase tlo tamelepe. Amasiyama a:yata kokosase tamolowe wota:lepiye, ya: ka:dena, isikimi ya: dokopala tlo bopudlowe.

<sup>7</sup> Amasiyama oplamitapo ya: dokopalaye pobopudlowa. Adipalati, ya:tapo God mila:pi mate epo ya:ta hela:dle mateye ya: tle botomastamhalapo. Amasiyama a:ya tle oplami hiye di dla ta:demhalapo.

<sup>8</sup> Adipalati, oplamiye a:ya tle pomita:pena, asiyama a:ya tlo oplami tle mita:puwapo.

<sup>9</sup> Epame oplamiye a:ya yilo pomita:pena, asiyama a:ya tlope oplami yilo mita:puwapo.

<sup>10</sup> Epapele koko tle a:yatapo ya:ta ya:wolalita itiyamale isili tle halema dle kokoye banakaka so dla imama ya: dokopala bopudlowe tlo ka:pipo.

<sup>11</sup> Amasiyama Lod dulu dla a:yatapo oplami dla koko pato halapo. Epame asiyama oplami mape

a:ya dla koko pato halapo.

<sup>12</sup> Adipalati, ka:yapa a:yaye oplami tle mita:puwapo. Epapele flope ma wola:tapo opaye hohomha:ha:po. Amasiyama Godtapo koko hapuloma iye sitali halapo.

<sup>13</sup> Epedeme wua: malamaiya, ka:deta:, a:yatapo inoma sumala tamama ya: dokopala pobopudlalo tloweye?

<sup>14</sup> Oplamitapo kokosase seselemalli mate hale-mama ya:skamu ya: dla wota:le hamimdepo.

<sup>15</sup> Amasiyama a:ya dla ya: kokosasete seselemallitapo ya: dla siyele hamimdepo. Epame kokosase seselemalli etapo ya:skamu ya: bopudlepo depame ya: dla hamiwapo.

<sup>16</sup> Epedeme God ya: opa hapulomatapo koko hatlo iye dolumha:ha:po. Epedeme oplami hale-tapo koko hema na: mate yu topulolloweye po-ala:na.

### *Lod malamale daya dele*

<sup>17</sup> Na: yu iye wua: dla atlemama posiyesema. Adipalati, wua:ta yimkata alupo inoma sumha:ha: kokotapo wuskamu wua:ye pogadesema.

<sup>18</sup> Adipalati, wua:ta alupo inoma sumde dulu dla gladle ela kokoye na: me-dalepame koko eye mikadepe mle duwa.

<sup>19</sup> Amasiyama wua: dulu dla hukulli ela koko tle wua:tapo woloma ikadepe api tiyama tle ha:ha: so malanati epame batalimale api tiyama tle ha:ha: so ma malanati depo.

<sup>20</sup> Epapedeme wua:ta yimkata puame alupo Lod malamale daya demdiye, woloma ikadepe Lod malamale daya demama po-aposemde.

<sup>21</sup> Adipalati, wua:ta yimkata alupo daya dlomde dulu dla wua: woloma hapuloma yimkatata ma alupo gudlati edla daya podeseemde. Amasiyama opi tatile daya mo-dlomyelati opitapo ala me-alumhalemdepo. Epammama wua: dulu dla opita daya dimi pumulale soye pogadesemde. Epapele koko tle opitapo daya teta:le mate popa:lati opitapo daya sikemte susukalle mate popa:mdepo.

<sup>22</sup> Epapalala depame wua:ka:dena, mo-wua: aya ikadepe dla daya mo-dlopame ma Lod malamale daya dele dla puluwe ka:pi. Adipalati, wua:ta yimkata alupo daya dele dulu dla daya pa:talo so pogadlalo wekemde kokotapo yia: dla wota:le hampumama mo-wua: sos dla mape wota:le hampumdepo. Epapedeme na: ma apa kokoye wua: dla atlepa:? Wua:ta malamaleta koko hema na:ye siyema dema:? Hao. Na: posiyesema.

<sup>23-24</sup> Epapedeme na:tapo Lod tle imale koko hauwaye ma wua: dla hamima. Lod Yesu opahale so do tama dla homellowe utula:la oloma edla ya:tapo daya hapo siyele yu atlepo gudepame hauwokokopo halemama epo atluwapo, “Iye na: motopo, wua: yilo hamipo. Epedeme wua: na: malamale mate ha:ha:mama daya iye dlomha:ha:lepe,” duwapo.

<sup>25</sup> Epame daya dele mogudlati Yesu ma isilako hapame epo atluwapo, “Isilako iye Godta na: omali tle yu itiyapo himili amko ipo. Wua:tapo isilako itle yú dlomha:ha:mama na: malamale mate dlomha:ha:lepe,” duwapo.

<sup>26</sup> Epedeme wua:tapo daya i mate epo yú i mate dlomha:ha:mama Yesuta powale kokoye botomas-tamha:ha:lepe, ya:ta puluwe alila dla omtamama.

27 Epapedeme oplami antapo sosoka:lli koko mate daya i hapo depame ma Lod ya: isilako tle yú delepiye, ya:tapo Lod ya: moto mate epo ya: omali mate dla batalimale koko ma-hapo.

28 Epapedeme oplamitapo ka:yapa ya: tatile ya:skamu ya: kokoye totapame alotle daya depo matle Lod ya: isilako tle yú delepe.

29 Adipalati, ya:tapo Yesuta powale kokoye woloma pomalamalalo daya mate yú mate delepiye ya:skamu ya: dla koko gladleye hampuapo.

30 Epapele koko tle wua: dulu dla mo-pasatale sepeletapo hopeyalimama esusulmale mate ha:ha:po. Epame opitapo mo-paliwapo.

31 Amasiyama ditapo di kokoye woloma ikadepe api tle totamha:ha:lepiye, eta ditapo Godta kasilamale isili tle poha:ha:lowa.

32 Amasiyama Lodtapo di koko glademama di posalemhalapo, ditapo ta:la so mate Dlapa mo dla tlala depame.

33 Epapedeme mikadepe dle so namkadulo, wua:tapo Lod malamale daya dlowedeme woloma wua: amkadulota ma-alupo gudlati edla yimkata daya de demha:ha:iya.

34 Epele dulu dla oplami antapo daya ta:lepiye, ya: ka:dena, ya: tatile ya: aya dla daya depame ma yimkata alumale dla pulupe. Adipalati, wua:tapo ma yimkata alupo daya de demha:ha: koko dla Lodta wua: koko gladlala depame. Koko opiye na:tapo alotle wua: hala dla puame ka:ka:dlowepo.

*Sokota isikimi namkale dle tle hapimhala koko*

<sup>1</sup> Mikadepe dle so namkadulo, na: ma posolotamasema, wua:tapo Sokota isikimi namkale dle tle hapimhala koko woloma pomalamalalo yeitapo ha:ha:loweye.

<sup>2</sup> Wua: ka:yapa ala pomikadepe dlalo ha:ha:lati wua:ye biskapa god dota mita:ple dla mikadepe dlepo depame elemsiyamuwa kokoye malamaiya. Epele dulu dla biskapa god iwoloye yuhalowe poyia:malamana.

<sup>3</sup> Epedeme na: wua: dla ikadepe koko atlema. God ya: Sokota semsela:lalo oplamitapo ma Yesu hi dla putlopo atloweye po-ala:na. Epame isikimi God ya: Sokota semsela:lalo oplamitapo Yesuye Lodpo dloweye ala:na.

<sup>4</sup> Sokota isikimi namkale dle tle hapimhala koko meyelope meyelope dleye opa dla hapimhalapo. Amasiyama Soko hatlo eta hapimhalapo.

<sup>5</sup> Epame sos dulu dla oko meyelope meyelope dleye me-hutiyepo, amasiyama oko hapuloma etle Lod hatlo yilo oko hamdepo.

<sup>6</sup> Epame itiyamale koko meyelope meyelope dle ma me-hutiyepo. Amasiyama God hatlotapo itiyamale eye dita hapuloma dla hapilalo halapo.

<sup>7</sup> Hela:dle Sokotapo sosta ta:lepo depame koko meyelope meyelope dleye mikadepe dle so dla hapimhalapo.

<sup>8</sup> Soko hatlotapo oplami hale dla ka:depo malamale mate yu atlowe itiyamaleye hamimdepo. Epame ma Soko hatlo meta oplami hale dla malamale pato hamimdepo.

<sup>9</sup> Epame ma Soko hatlo meta oplami hale dla mikadepe dle itiyamaleye hamimdepo. Epame

ma Soko hatlo meta oplami hale dla esusulumale so ka:ka:dlowe itiyamaleye hamimdepo.

<sup>10</sup> Epame matle Soko hatlo meta oplami hale dla ulugiyemale koko halomolowe itiyamaleye hamimdepo. Epame Soko hatlo meta oplami hale dla God tle yu hapame molo atlowe itiyamaleye hamimdepo. Epame ma Soko hatlo meta oplami hale dla God ya: Soko mate epo soko opi mate malanatlowe itiyamaleye hamimdepo. Epame ma Soko hatlo meta oplami hale dla ulugiyemale yu mate yukamolowe itiyamaleye hamimdepo. Epame ma Soko hatlo meta oplami hale dla ulugiyemale yu mate yukamale ya: dulu koko woloma hatostepo atlowe malamaleye hamimdepo.

<sup>11</sup> Amasiyama koko hapuloma iye Soko hatlotapo hapimhalemama woloma ya:ta solotamale tle opa dla alemhalapo.

### *Moto hatlope, u-ulalimale tlo pasatale*

<sup>12</sup> Keliso motoye dali moto hatlotapo dlo tlo pasatale halem diye epapele some halapo. Epele dulu dla moto tlo hatlopepo, asiyama ya: dla u-ulalimale dlo tlo sikemte pasatana.

<sup>13</sup> Epedeme dita hapulomaye Keliso moto hatlope dulu dla u-ulalimale meyelo pe meyelo pe depo ha:ha:po. Epele dulu dla opi dia:ye Yu sopo, epalati opiye po-Yu sopo, epalati opiye asiyama pa:le dla oko halomalalo sopo, epalati opiye yia: dokopala sopo. Amasiyama dita yú tutula:uwa oloma edla Hela:dle Soko hatlope tle dita hapulomaye moto hatlope dla ma gugoudlalimuwapo.

Epame Hela:dle Sokoye dia: watle yú some olost-lati dita hapulomatapo Hela:dle Soko eye modlomuwapo.

<sup>14</sup> Epedeme moto patoye ulumale hatlota hal-lati pohalasema. Amasiyama u-ulalimale hapulo-mata halemama moto hatlo pato tipo halapo.

<sup>15</sup> Epele dulu dla heteta ipo atellepe, “Na:ye podo, epapedeme na:tapo moto pato ipi pohal- lasema,” dlepe. Amasiyama heteta epo atla kokota ya:ta moto hatlo dla ulupo halaye medla ga:dedepa:? Hao, pe-epapolowa.

<sup>16</sup> Epame molo ma mepapena. Ya:ta atlemama, “Na:ye po-inoma, epedeme na:tapo moto pato ipi pohalasema,” dlepe. Amasiyama molota epo atla kokota ya:ta moto hatlo dla ulupo halaye medla ga:dedepa:? Hao, pe-epapolowa.

<sup>17</sup> Epele dulu dla moto hatlo patoye isikimi in-oma siyapota halematiye, asiyama dallowe tlo adipo dalemha:ha:lemo? Epame moto hatlo pa- toye isikimi molo siyapota halematiye, asiyama ullu pamalalo muye hadima hallemo?

<sup>18</sup> Amasiyama Godtapo meyelo malamale tle solotapame moto dla u-ulalimale meyelo meyelo dleye miyelo ha:ha:lowe mo dla u- ulalimuwapo.

<sup>19</sup> Epedeme moto dla u-ulalimale hapuloma meyelo meyelo dle ha:ha:ta ma isikimi mila:pi hatlope depo halematiye, asiyama moto ikadepe pato iye pohalema.

<sup>20</sup> Epapedeme ya:tapo moto hatlo dulu dla u- ulalimale hapuloma meyelo meyelo dleye mo-mimita:puwapo. Epapele koko tle yia:ta hapu- lomatapo moto hatlo pato tipo ha:ha:po.



<sup>21</sup> Epapele koko tle inomatapo do watle atlemama, “Na: wa: posolotamasema,” dloweye poka:dena. Epalati asiyama dokopalata hete watle atlemama, “Na: wa: posolotamasema,” dloweye poka:dena.

<sup>22</sup> Amasiyama moto hatlo dla u-ulalimale opi pase sikemte i-itiyamale mate ha:ha:tapo moto dla koko pato depo ha:ha:po.

<sup>23</sup> Epame ditapo di moto dla u-ulalimale yimlala opi dita haliyamale dla ha:ha:lowe tlo pase ka:ka:pi dlaloye, ma ditapo woloma ka:pi nati-mama totowalimdepo.

<sup>24</sup> Amasiyama u-ulalimale opi haliyamale dla ha:ha:laloye ditapo pase totowalisemde. Epedeme Godtapo u-ulalimale opi dita pase ka:ka:pi dlaloye koko patoto dla hatitimuwapo.

<sup>25</sup> Godtapo ipo dinapuwapo, moto hatlo dulu dla hukulli pa:po ha:ha:lepo depame. Epame u-ulalimale hapulomatapo ya:mkale asiyama sikemte malama asiyama sikemte malama demha:ha:lepo depame.

<sup>26</sup> Epapedeme moto hatlo dla ulumale hatlota wotiyalle natilipiye, u-ulalimale opi hapulomatapo yimkata ya: mate wotiyalle ipi eye halomdepo. Epame ma ulumale hatlota siyele halepiye, u-ulalimale opi hapulomatapo yimkata ya: mate siyele halomdepo.

<sup>27</sup> Mikadepe dle so hapuloma wua:ye Keliso ya: motopo. Epapedeme wua:ta hatlope hatlope dle hapulomatapo ya: dla u-ulalipo ha:ha:po.

<sup>28</sup> Epapedeme Godtapo wua: dulu dla ka:yapa opa opi dla Taiya dle okoye ma-hapiwapo. Epame ma medla opa opi dla God tle yu hapame molo at-

lamalalo okoye hapiwapo. Epame ma medla opa opi dla God yu atlowe okoye hapiwapo. Epame ma opa opi dla ulugiyemale koko halowe itiyamaleye hapiwapo. Epame opa opi dla esusulumale so ka:ka:dlowe itiyamaleye hapiwapo. Epame opa opi dla yimkadulo gagadlowe itiyamaleye hapiwapo. Epame opa opi dla sos omha:ha:lowe oko hapiwapo. Epame ma opa opi dla ulugiyemale yu yuhalowe itiyamaleye hapiwapo.

<sup>29</sup> Epapele dulu dla opa hapulomatapo Taiya dle so ha:ha:ma:? Epame opa hapulomatapo God tle yu hapame molo atlamalalo so ha:ha:ma:? Epame opa hapulomatapo God yu atlalo so ha:ha:ma:? Epame opa hapulomatapo ulugiyemale koko halomalalo so ha:ha:ma:?

<sup>30</sup> Epame opa hapulomatapo esusulumale so ka:ka:dlalo ha:ha:ma:? Epame opa hapulomatapo ulugiyemale yu yuhalalo ha:ha:ma:? Epame opa hapulomatapo ya: dulu kokoye ma woloma hatostepo atlamalalo ha:ha:ma:?

<sup>31</sup> Amasiyama Sokota wua: dla isikimi namkale dle tle me-hapimhala dulu dla woloma ka:ka:dle tlo halomolowe dla sikemte solotamale pato himme ha:ha:iya.

## 13

### *Ya:mkale bokotiyapo malamolowe koko*

Wata na:tapo wua: watle sikemte ka:dle apiye nati-ima.

<sup>1</sup> Epapedeme na:ye opata yuhalalo yu hapuloma mate epame ma banakaka sota yuhalalo yu hapuloma mate malastepo halemama asiyama ya:mkale bokotiyapo malamale koko tlo na:

dla hawa hallepiye, na:ye isikimi koko pa:le yu siyapota sisikalemsela:mama apopo.

<sup>2</sup> Epame na: dla God tle yu hapame molo atlowe itiyamale mate epo hemele koko hapuloma mate sikemte malastepo halemama asiyama na: dla ya:mkale bokotiyapo malamale koko tlo hawa hallepiye, na:ye koko pa:le oplamipo. Epame na: dla ka:depo malamale mate epo mikadepe dle kokalle koko tle tamali patoto alikili dla dodokati-molowe itiyamale mate hapo halemama asiyama ya:mkale bokotiyapo malamale koko tlo pa:po hallepiye, na:ye koko pa:le oplamipo.

<sup>3</sup> Epame na:tapo na: dla hutiyelalo alisisi hapulomaye alisisi pa:talo so dla hapipame ma yia: dla pobokotiyapo malamalalo hallepiye, na: koko pa:le oplamipo. Epame ka:dle koko yilo na:tapo na: motoye dlapa mistlowe dla himipame ma na: dla ya:mkale bokotiyapo malamolowe pa:le hallepiye, na: ikadepe koko pa:le oplamipo.

<sup>4</sup> Ya:mkale bokotiyapo malamolowe kokoye woloma sadepo hallowe kokopo, epame woloma namkale depo hallowe kokopo. Ya:mkale bokotiyapo malamolowe koko dulu dla ya:mkale ellewe kokoye pe-elasema. Epame ya:skamu ya: tlo di dla hamhetlowe koko mate epo ya:skamu pepemolowe koko mateye pohutiyesema.

<sup>5</sup> Epame ya:mkale dla alli hamilowe koko mate epo ya:skamu ya: tlo malamolowe koko mate epo hapele siyaladlowe koko mate pohutiyesema. Epame ya:mkale bokotiyapo malamolowe kokotapo batalimale hapulomaye kokó pomalahallalo isikimi wowelimhalapo.

<sup>6</sup> Epame ya:mkale bokotiyapo malamolowe

kokotapo batalimale koko dla posiyemhalasema. Amasiyama woloma ikadepe koko dla siyemhalapo.

<sup>7</sup> Epame ya:mkale bokotiyapo malamolowe kokotapo koko hapuloma dla sukalemama po-alimhalasema. Epame ya:mkale bokotiyapo malamolowe kokotapo God dla hitahalemdepo. Epame Godta pasakalo hamilowe alilata puluwe dla sadle mate omhalemdepo. Epame koko hapuloma dulu dla kokalepo hallowe kokoye hampumdepo.

<sup>8</sup> Ya:mkale bokotiyapo malamolowe koko itapo gudlowe sukulu pa:le hallepe. Amasiyama dulu edla God tle yu hapame molo atlamde kokota pa:lepe. Epame ulugiyemale yu mate yuhalowe koko mate epo Soko tle ka:depo malamale halowe koko mate ma medla pa:lepe.

<sup>9</sup> Adipalati, dia: dla hutiye ka:depo malamale mate epo God tle yu hapame molo atlamde koko mateye ala woloma po-ala:po halasema.

<sup>10</sup> Amasiyama woloma ikadepe ala:po pustale kokota woyamelepiye, asiyama woloma po-ala:lalo wekele kokotapo pa:lepe.

<sup>11</sup> Epame na:ta maseyemala haluwa oloma edla na:tapo yimka:sikilita atlamalalo yuye yukamsela:uwapo. Epame oloma edla na:tapo maseyemalata malamdiye epamhaluwapo. Amasiyama na:ta wata ikadepe mo-oplami duwa oloma edla na: ma maseyemala some koko halomhallowe memeluwapo.

<sup>12</sup> Wata oloma hema di inomatapo yú ka:le dulu dla natilati amtutuwalemdiye, epapele some halapo. Amasiyama alotle di inomatapo ma

woloma gilistlati di ma woloma ka:depo natilipe. Epame wata oloma hema ditapo koko opi tlo malastepo ha:ha:po, amasiyama alotle Godtapo di koko malastepo halaye epammama di mape koko hapulomaye malastlepe.

<sup>13</sup> Epapedeme mikadepe dle koko mate epo koko dla dalemhalemama omhallowe koko mate epame ya:mkale bokotiyapo malamolowe koko matetapo kokó me-hutiyelepe. Amasiyama dapa-hatlope koko dulu hema koko ikadepe sikemte patoye ya:mkale bokotiyapo malamolowe kokopo.

## 14

*Ulugiyemale yu mate yuhalowe koko mate epo God tle yu hapame molo atlowe koko mate*

<sup>1</sup> Epedeme wua: ya:mkale bokotiyapo malamolowe koko dolumaiya. Epame God tle yu hapame molo atlamolowe koko tlo halowedeme sikemte solotamha:ha:iya. Epame Sokota isikimi hapimhala koko opi halomolowe ma solotamale mate omha:ha:iya.

<sup>2</sup> Adipalati, isikimi ulugiyemale yuta yukamalalo oplamiye ya: opa opi dla yu po-atlasemde. Amasiyama ya:tapo isikimi God dla yukamama ammdapo. Epame hemele hutie kokoye Soko tle atlemama ammdapo. Epedeme oplami haletapo ya:ta yukama ya: dulu kokoye pomaladalesemde.

<sup>3</sup> Amasiyama God tle yu hapame molo atlamalalo oplamitapo opata woloma ka:depo itiyamale mate ha:ha:lepo depame gadle yu mate opa dla atlamhalemdepo.

<sup>4</sup> Epele dulu dla ulugiyemale yu mate yukamalalo oplamitapo isikimi ya:skamu

gademdepo. Amasiyama God tle yu hapame molo atlalo oplamitapo ya:ta molo atlale koko mate mikadepe dle so hapulomaye gademdepo.

<sup>5</sup> Na: pase solotamasema, wua:ta hapulomatapo ulugiyemale yu mate yuhamyelepodepame. Amasiyama na:ta sikemte solotamaye, wua:ta hapulomatapo God tle yu hapame molo atlamalalo so depohaha:lepo depame. Adipalati, God tle yu hapame molo atlalo oplamitapo ulugiyemale yu mate yukamalalo oplamiye tlamtame halapo. Epapele tlope ulugiyemale yu mate yukamalalo oplamitapo ya:ta ulugiyemale yu mate yukamde ya:dulu koko ma opa hapulomata dallepo depame hatostepo atlalo oplami hallepiye, eta ya: mape God tle yu hapame molo atlalo oplami mate ala:po hallepe.

<sup>6</sup> Epedeme mikadepe dle so namkadulo, na:ta puame wua:ta haha: dla ulugiyemale yu mate yukamsela:lepiye, na: adipo wua: gadepa:? Amasiyama na:tapo wua: hala dla puame na:ta God tle yu haläye wua: dla woloma imelepiye, eta na:ta wua:ye ka:pi gademama apelepe.

<sup>7</sup> Adipalati, alisisi ipapele sepeleye pitikako mate epo woiyo mate woloma poyulalo wekelepiye, asiyama opata sala solowe edleye adipo himpa:?

<sup>8</sup> Epame opahale dele dulu dla hulu mape woloma posisilamalalo wekelepiye, antapo opahale koko dla dinapopa:?

<sup>9</sup> Epedeme wua: ma epapena. Wua:tapo opata pomalamalalo wekele yu mate yuhalepiye, yia: asiyama wua: yuye adipo maladalepa:?

<sup>10</sup> Epedeme ta:lamo pato hema yu meyelo pe meyelo pe dle ma me-hutiyepo. Epapele tlope yu hapuloma dulu hema yeitamale so dla ulugiyemale yu demdepo.

<sup>11</sup> Epedeme oplami haletapo isikimi ya: yu mate na: dla yukamelepiye, na: adipo ya: yuye mal-adalepa:? Epapele koko tle na:tapo ya: yu yeliyemama oplami e watle yu meyelo pe oplami dlepe. Epalati asiyama ya: mape na: watle yu meyelo pe oplami dlepe.

<sup>12</sup> Epapedeme ipapele koko mape wua: dulu dla me-elapo. Epapele dulu dla wua: Sokota hapili kokoye sikemte solotamha:ha:po. Epapedeme wua: asiyama sosta ta:lepo depame Sokota hapili kokoye sikemte totamha:ha:iya.

<sup>13</sup> Epedeme ka:dena, ulugiyemale yu mate yukamalalo oplamitapo matle Godta ya: watle ya:ta ulugiyemale yu mate yukamhala ya: dulu koko woloma hatostepo atlowe malamaleye hamilipo depame inoma sumale himme hallepe.

<sup>14</sup> Adipalati, na:tapo ulugiyemale yu mate God dla inoma sumelepiye, na: soko mape God dla inoma sumelepe. Amasiyama na:ta malamale tlo woloma pohatostlowa.

<sup>15</sup> Epapedeme na: apa koko hapa:? Na: ka:dena, ulugiyemale yu mate inoma suma epo na: yu ikadepe mate inoma suma dloweye. Epammama na:tapo ulugiyemale yu mate siyele sala doluma epo na: yu ikadepe mate siyele sala doluma dloweye.

<sup>16</sup> Adipalati, wa:tapo ulugiyemale yu mate God dla siyele ta:demama inoma sumelepiye, asiyama yu yeliyele oplamitapo wa:ta inoma sumale yuta

tame gudle oloma dla ya: adipo dalepo mogudepo depa:? Adipalati, ya:ye poya:malamana, wa:ta atla kokoye.

<sup>17</sup> Amasiyama pona:malamana, wa: api ka:dle tle God dla siyele ta:demhalemama apeyo. Epapele tlope asiyama oplami hale eye pogadesema.

<sup>18</sup> Na: God dla siyele yu atlema. Adipalati, ulugiyemale yu yuhalë dulu dla na:tapo wua:ta hapulomaye ma-tla:mtame halapo.

<sup>19</sup> Amasiyama na:ta mikadepe dle so imolowedeme isikimi yia:ta malamale yu mate imolowe tlo ka:pi. Asiyama yu ulugiyemale mate imolowe poka:dena.

<sup>20</sup> Epapedeme mikadepe dle so namkadulo, wua: ase akimlalata malamale some ha:ha:miya. Amasiyama wua:ta malamale tle mo-opa dle some ha:ha:iya. Epame wua: bobtalimale koko halomolowe dla owayimlala some ha:ha:iya. Adipalati, yia: dla batalimale koko momalamolowe poya:malamana.

<sup>21</sup> God yu buka dla yuta ipo elapo,  
 “Lodta epo atlema,  
 ‘Na:tapo yu meyelope meyelope dle yu halalo so mati tle na: opa Isalael so dla yukamolowepo,  
 Amasiyama yia:tapo na: yuye woloma pomaladallowa.’”

<sup>22</sup> Epapedeme ulugiyemale yu mate yuhaloweye pomikadepe dle so dla Godta koko gladlowe kokoye imolowe kokopo. Asiyama koko iye mikadepe dle so dla po-atlasema. Amasiyama God tle yu hapame molo atlowe kokoye mikadepe



dle so dla imolowe kokopo, asiyama pomikadepe dle so dla po-atlasema.

<sup>23</sup> Epedeme mikadepe dle so wua:tapo hatlo yimkata alupo ha:ha:mama ulugiyemale yu mate yuhamha:ha:lati asiyama pomikadepe dle sota wua: natipo wua:ye yiyilamsiyamama amma dlepe.

<sup>24-25</sup> Amasiyama mikadepe dle so wua:tapo God tle yu hapame molo atlamha:ha:lati asiyama pomikadepe dle sotapo puame yu e dalle tle yiskamu yia: bobtalimaleye tlamelepe. Adipalati, wua: yutapo yia: kokoye glademama yia: dupa dulu dla hemele hutiye batalimale koko hapulomaye ma haliyamale dla bobotimatimelepe. Epalati yia:tapo alumata akukulume God dla inoma sumpopa:mama epo atlamyelepe, “Ikadepe, Godye wua: mate halapo.”

*Mikadepe dle sota alupo inoma sumha:ha:lowe koko*

<sup>26</sup> Epapedeme mikadepe dle so namkadulo, wua:ta inoma sumha:ha:le dulu dla wua: ipapele koko tlo dolumha:ha:lowe ka:pi. Epedeme wua:ta yimkata inoma sumale dulu dla haleta sala dolumalalo hallepe. Epalati haleta God yu atlalo hallepe. Epalati haleta God tle amko kokota puaye bobotimatimalalo hallepe. Epalati ma haleta ulugiyemale yu mate yukamalalo hallepe. Epalati ma haleta yu e ya: dulu kokoye opa dla hatostepo atlalo hallepe. Epapele dulu dla koko meyelope meyelope dle hapuloma itapo wua:ta mikadepe dle kokota ta:lepo depo ammdopo.

<sup>27</sup> Epedeme ka:dena, opata ulugiyemale yu mate yuhalè oloma dla isikimi opa dapiyamte o dapa-hatlopeta apolowe ka:pi. Epame yia:ta ulugiyemale yu mate epo yuhalè oloma edla woloma ya:mkale tatile yukapo gudlati ma ya:mkaleta yukama dlowe ka:pi. Epame oplami haleta yu eye ma opa hapulomata dallepo depame hatostepo atlowe ka:pi.

<sup>28</sup> Amasiyama ulugiyemale yu mate yuhalatati yu e hatostepo atlalo oplami hawa hallepiye, ka:dena, epo ulugiyemale yu mate yukamalalo oplamita inoma sumale dulu dla yu dimi polo-mama ya:skamu ya: dla epo God dla yukamolowe tlo ka:pi.

<sup>29</sup> Epalati wua:ta inoma sumale dulu dla God tle yu hapame molo atlamalalo so alumale dulu dla isikimi opa dapiyamte o dapahatlope epapeleta God yu molo atlamha:ha:lowe tlo ka:pi. Epalati asiyama opitapo yia:ta atlama ya: dulu kokoye hukullalo so ha:ha:lepe.

<sup>30</sup> Epame asiyama wua:ta popa: dulu dla pakasiyamalalo Godtapo oplami hale watle koko bobotimatimelepiye, ka:dena, ka:yapa yu atlalo oplami aseka hedepo pollowe.

<sup>31</sup> Epame ka:dena, wua:tapo God tle yu hapo atlamha:ha:mama ya:mkale tatile atlepo gudlati ma ya:mkaleta atla demha:ha:loweye. Ipapele api tle wua:tapo opa hapulomaye woloma gadlowedeme imama apelepe.

<sup>32</sup> Adipalati, God yu molo atlamalalo sotapo Sokota yia: dulu dla oko hamde kokoye miyelo omha:ha:po.

<sup>33-34</sup> Adipalati, Godye kokota batalipo telepo

depame sosoka:lipo mellalo Godta pohalasema. Amasiyama ya:ye kokota woloma ka:depo telepo depame ka:depo dinapolalo Godta halapo.

Mo hapuloma dla sos popa:mta dulu dla ela koko e dolumama wola:tapo wua:ta inoma sumale dulu dla yu dimi sadle mate popa:lowe ka:pi. Adipalati, Mosesta aiyalma hatitimale mape hatlo mepo atlapo.

<sup>35</sup> Epele dulu dla yia:tapo koko opi dlallowe solotamelepiye, yia: ka:dena, yia: aya dulu dla yia:wolalidulo wadle atlanatilipe. Adipalati, a:yata inoma sumale dulu dla yu atloweye pase ka:dena.

<sup>36</sup> Epapedeme wua:tapo na:ta atlama koko iye dolumala allipiye, na: epalati asiyama ipo atlowepo, “Wua: tle God yuye kotiyamuwa? Epame God yuye isikimi hatlo wua: siyapo dla puwa?” dlowepo.

<sup>37</sup> Epapedeme opa yiskamu yia:ye God tle yu hapame molo atlamalalo so dlalo mate epo yiskamu yia:ye Soko poposatilimale so dlalo mateta na:ta wua: dla yu ilipo hami iye Lod tle puma dlowe ka:pi.

<sup>38</sup> Epapedeme wua: na: yu dalla alilalo oplami yuye dalemiya.

<sup>39</sup> Epapedeme mikadepe dle so namkadulo, wua: ka:dena, God tle yu hapame molo atlam-siyamolowe koko tlo sikemte totamaiya. Epamama ulugiyemale yu mate yuhalalo soye humatlemiya.

<sup>40</sup> Amasiyama ka:dena, koko hapulomaye woloma ka:dle api tle halomha:ha:lowe ka:pi.

# 15

## *Kelisota wabasi tle ma sila:tili*

<sup>1</sup> Mikadepe dle so namkadulo, na:ta ka:yapa wua: dla ka:dle yu hame atlampulati wua:tapo dalepo mikadepe depame dulu medla kokalepo ha:ha:uwapo. Amasiyama wua:ta welilala depame na:tapo wata koko iye mamisika: wua: dla imolowama.

<sup>2</sup> Epame wua:tapo na:ta wua: dla ka:dle yu atlamuwa koko hema sikemte kokata hamame ha:ha:lepiye, etapo wua: pasakaloye gadlepe. Amasiyama wua:ta matle biskapa koko imale dla mikadepe dlepiye, eta wua: pasakalo pogadlowa.

<sup>3</sup> Na:tapo ka:yapa dalepame hamuwa kokoye ma na:tapo wua: dla atlamuwapo. Adipalati, koko iye pta pato. Eye Kelisotapo di bobtalimale yilo pouwapo, God yu bukata atla e dolumama.

<sup>4</sup> Epame God yu bukata atla e dolumama ya:ye ta:la dulu dla hamatilati wabasi dulu dla elepo depame ma alila dapahatlope oloma dla sila:tiwapo.

<sup>5</sup> Epame ya:tapo Pita dla tame woyamuwapo. Epame ma alotle tame ya: alotle tlalo so dla woyamuwapo.

<sup>6</sup> Epame ma alotle ya:tapo alila hatlo dulu medla mikadepe dle so 500 opa dla tame woyamuwapo. Opa hapuloma dulu hema opa opi tlo mo-palimama opihata tlo me-ha:ha:po.

<sup>7</sup> Epame ya:ye ma Yeims hala dla tame woyamuwapo. Epame matle Taiya dle so opa hapuloma dla tame woyamuwapo.

<sup>8</sup> Epame ma mosukulu dla ya:tapo na: dla puame woyamuwapo. Epapele dulu dla na:ye

a:yata owayemala hammama ala polo yemala hamdiye, na: epapele some hallati apuwapo.

<sup>9</sup> Adipalati, Taiya dle so hapuloma dulu dla hatlo na: tlo yimka:mala ikadepepo. Epame opatapo na:ye Taiya dle oplami ikadepe dloweye poka:dena. Adipalati, ka:yapa na:tapo God ya: opa dla wotiyalle hapilalo oplami haluwapo.

<sup>10</sup> Amasiyama Godta polowamale koko tle na:tapo wata ipo halapo. Adipalati, Godta na: dla ya:ta polowamale koko hamiwaye, na:tapo eye podosomana. Amasiyama namkadulo Taiya dle so alumale dulu dla hatlo na:tapo okoye sikemte hauwapo. Epele dulu dla monolo na:ta itiyamale tle pa-amdena. Amasiyama Godta bokotiyapo malamaletapo na: dulu dla halemama oko hamhalemduwata ammduwapo.

<sup>11</sup> Epedeme Taiya dle so namkadulota ka:dle yu atlamsiyama koko hatlo meye ma na:tapo wua: dla atlamsela:po. Epalati asiyama wua:tapo ka:dle yu edla mikadepe duwapo.

*Palli sotapo wabasi dulu tle ma silliwe koko*

<sup>12</sup> Ditapo Godta Kelisoye wabasi dulu tle ma ta:dle kokoye atlamsiyamapo. Ame wua: adipalati wua: dulu dla opa opita atlemama, “wabasi dulu tle ma silliwe kokoye hawa,” demsiyama:?

<sup>13</sup> Wabasi dulu tle silliwe kokoye hawa halematiye, Keliso mape wabasi dulu tle posila:tima.

<sup>14</sup> Epame Kelisota wabasi dulu tle posila:tilalo wekematiye, dita ka:dle yu atlamsiyama i mape koko pa:le hallemla. Epame wua:ta mikadepe dle koko mape isikimi koko pa:le ellemla.

15-16 Epame di mape God koko dla isikimi mala-atlamsiyamelemla. Adipalati, ditapo Godta Kelisoye ma pasakalo dla ta:dleye ma-atlamsiyamuwapo. Epele dulu dla Godta palli soye pasakalo dla pota:dlalo wekele kokota ikadepe demhalematiye, ya: Kelisoye pasakalo dla ma pota:dema.

17 Epedeme Godta Kelisoye pasakalo dla pota:dlalo wekematiye, wua:ta mikadepe dle kokotapo koko pa:le hallemla. Epame wua: mape wua: bobtalimale dulu medla ala me-ha:ha:lemla.

18 Epame koko ita ikadepe dematiye, Keliso dla mikadepe dle sota palliye mosukulu batalimelemla.

19 Epapele dulu dla Keliso dla mikadepe dlowe kokoye isikimi wata dita ha:ha: pasakalo i siyapo gadlepe depo malamatiye, di yimkadulo. Di ikadepe sikemte yeitamale so depo ha:ha:lemla.

20 Amasiyama Godtapo Kelisoye powale tle ma pasakalo dla ta:dleye mikadepepo. Epedeme koko itapo dia:ye imapo, opa anawolotapo mo-palipo hutiyema:, yia: mape palli tle ma pasakalo dla sillipe.

21 Epedeme polowe kokotapo oplami tle puwapo. Epapedeme asiyama powale tle ma pasakalo dlowe koko mape oplami tle puwapo.

22 Adipalati, A:damtapo polowe kokoye opa hapuloma dla hampuwapo. Amasiyama ma watapo opa hapulomatapo Keliso dulu dla pasakalo hamha:ha:lepe.

23 Amasiyama Keliso tatile powale tle masila:tiwapo. Epame mikadepe dle so opatapo Kelisota ma ilame puluwe oloma edla yia:tapo

palli tle sillipe.

<sup>24</sup> Epalati oloma edla Kelisotapo ta:lamo dokopala so mate epo itiyamale soko hapuloma mateye mosukulu batalipo hamastapame ma ya: mo kokoye A God watle hamilipe. Epapele alotle ta:lamota mosukulu tame gudlepe.

<sup>25</sup> Kelisotapo ya: dla opahale dlalo so hapulomaye ya: hete sitali isili dla ipila:lowe alila dla ompumama ya:tapo dokopala depo hallepe.

<sup>26</sup> Epedeme Kelisotapo ya: dla opahale dlalo so hapuloma poyumtame gudepame ma mosukulu dla yumuluweye polowe kokopo.

<sup>27</sup> Adipalati, God yu bukata epo atlapo, “Godtapo koko hapulomaye ya: hete sitali isili dla ma-hatitimuwapo,” depo.

Epedeme dimalamana, God yuta atlemama koko hapuloma Keliso hete sitali isili dla hatitimuwa deye, God yo mate isili dla pohimina. Adipalati, hatlo God ya:tapo koko hapulomaye Keliso hete sitali isili dla hatitimalalo halapo.

<sup>28</sup> Ya:tapo koko hapulomaye Yami hete sitali isili dla hatitipo gudlati Yamitapo ya:skamu ya:ye A Godta itiyamale isili dla himilipe. Epapele koko tle koko hapuloma dulu dla God hatlo ya:tapo pato hallepe.

<sup>29</sup> Epapedeme palli tle ma silliwe kokota pe-ellalo wekematiye, ame adipalati opatapo yimkadulo yú potutula:lalo palli so yilo ma ya:ta yú tutula:mdi?

<sup>30</sup> Epame palli tle ma silliwe kokota pe-ellalo wekematiye, di adipapalati diskamu dia:ye God yu yilo alila hapuloma dulu dla wotiyalle dulu

dla halopo tulumama polowe mateka:pi dla hatitimdi?

<sup>31</sup> Epapedeme mikadepe dle so namkadulo, na:tapo Yesu Keliso di Lod dulu dla wua: yilo siyemhala kokoye atlemama ipo atlema, na:tapo alila hapuloma dulu dla polowe mateka:pi dla halemde.

<sup>32</sup> Palli tle ma silliwé kokota pe-ellalo wekematiye, ame na: adipalati Epeses mo dla halemama na: dla opahale dlalo so, moko esemala sepele mate natalimhaluwa? Epedeme Godta palli soye ma pasakalo dla pota:ta:dlalo wekematiye, eta

“ditapo daya mate yú mate dlomha:ha:lemla.

Adipalati, iyelaye polowe alilata pulupe.”

<sup>33</sup> Epedeme wua: ase opa opitapo wua:ye alikili dla elemta demiya. Adipalati, batalimale so mate namkale depame hatlope depo siyamolowe kokotapo ka:ka:dle koko hapulomaye bobtalimdepo.

<sup>34</sup> Epapedeme wua: ka:dle koko halowe malamale hapame matle batalimale koko halomha:ha:miya. Adipalati, na:ta wua: dla wota:le hamilowedeme yu ipo atlema, wua: dulu dla opiye God koko yeitamale so me-ha:ha:po.

### *Wabasi dulu tle halopo silliwé moto*

<sup>35</sup> Epedeme wa:ta epo atlowe sepena, “Adipamama Godtapo palli soye ma pasakalo depa?: Epame yia:ye moto adipapele mate ma pasakalo depo sillipa:?” dlepe.

<sup>36</sup> Amasiyama wa:ye koko yeliyele oplamipo. Adipalati, wa: alisisi ale emeplepiye, ale e ya: moye ka:yapa ta:la dulu dla hutumdepo. Epalati ma ale amkota etle peyapo matamdepo.



<sup>37</sup> Epame wa:ta emde alisisi hapuloma eye isikimi ale yemalapo, moto pato pe-emasemde.

<sup>38</sup> Amasiyama Godtapo wa:ta alisisi emde edla ya: moto ikadepe hamili depo dinapeleye hamimdepo.

<sup>39</sup> Epapedeme pasakalo halemhala alisisi hapuloma mape yia: moye meyeloape meyeloape dle halapo. Epedeme oplayemala moye meyeloapepo, epame ta:la dla siyamalalo alinepi mo mape meyeloapepo, epame tea mo mape meyeloapepo, epame amalo mo mape meyeloapepo.

<sup>40</sup> Epame dulu edla Pepele dimo moto mate epo ta:lamo moto mate me-hutiyepo. Amasiyama Pepele dimo motota hela:dle mate epo ta:lamo motota hela:dle mateye pohatlope.

<sup>41</sup> Epedeme salita hela:dle mape meyeloapepo, epame mamata hela:dle mape meyeloapepo, epame tamilita hela:dle mape meyeloapepo. Epapele dulu dla tamilita hela:dle tlo meyeloape meyeloape dena.

<sup>42</sup> Epapedeme palli sota ma pasakalo dlowe koko ma epapena. Wabasi dulu dla hamatilalo motoye hutulalo motopo. Amasiyama Godtapo pasakalo dla ta:dlowe motoye pohutulalo wekelalo motopo.

<sup>43</sup> Epame wabasi dulu dla hamatilalo motoye poka:dena. Amasiyama Godta ta:dlowe oloma edla pta sikemte hela:dle mate hallepe. Epame hopeyamale motoye wabasi dla hamatilipiye, ma itiyamale dla ta:dlepe.

<sup>44</sup> Epame ta:lamo motoye wabasi dulu dla hamatilipiye, asiyama Pepele dimo motota wabasi dulu tle sillipe.

Epapedeme ta:lamo motota hallepiye, Pepele dimo moto ma me-halapo.

<sup>45</sup> Epedeme God yu bukata epo atlapo, “Ka:yapa haluwa oplami A:damyé pasakalo haluwapo,” depo. Amasiyama alotle puwa A:damtapo opa dla pasakalo hamilalo Soko halapo. Ya:ye Kelisopo.

<sup>46</sup> Pepele dimo moto tatile pahalana, ta:lamo moto tatile haluwapo. Epalati alotle Pepele dimo motota edla haluwapo.

<sup>47</sup> Epapedeme ka:yapa haluwa oplamiye God-tapo ta:la apupu tle mita:puwapo. Ya:ye ta:lamo oplamipo. Epalati ya: ko tle dolumalalo oplamiye Pepele di tle maluwapo.

<sup>48</sup> Ta:lamo so hapulomaye apupu tle mita:ple oplami some ha:ha:po. Epalati Pepele dimo soye Pepele dimo tle malale oplami some ha:ha:po.

<sup>49</sup> Epedeme ditapo ta:lata mita:ple A:dam moto sepele hapo ha:ha:ye, epammama ditapo ma alotle Pepele dimo tle malale oplami Keliso moto sepeleye halopo ha:ha:lepe.

<sup>50</sup> Epapedeme mikadepe dle so namkadulo, di ta:lamo mototapo God ya: mo koko dla polatuluwa. Adipalati, di moto iye hutulalo motopo. Amasiyama God ya: mo kokoye kokó elepo ellalo mopo.

<sup>51-52</sup> Amasiyama wua: daliya, na:ta hemele kokoye wua: dla botomastama. Dita hapuloma dulu dla opiye popalliwa. Amasiyama mosukulu hulu sisilamale oloma edla dita hapulomatapo pakasiyamalalo di ta:lamo moto itle ma meyelope dlalimelepe. Adipalati, hulu sisilamale oloma edla palli sotapo ma pohutulalo wekelalo moto halopo sillipe. Epame oloma edla di ala popalilalo

me-ha:ha:lowe so di moto mape meyelope dlali-pame pohutulalo wekelalo moto halomelepe.

<sup>53-54</sup> Adipalati, Godtapo dia: dla popo hutulalo moto hutiye iye uptipame matle popolalo wekelalo motoye didiyemellepe. Epapele oloma edla God yu buka dla yu elata mikadepe dlepe. Adipalati, God yu eta ipo elapo,  
 “Polowe kokoye ma-tla:mtame halapo.

<sup>55</sup> Epedeme poloweta tla:mtlowe itiyamale da?  
 Epame poloweta wotiyalle hamilalo itiyamale da:?” depo.

<sup>56</sup> Epapedeme polowetapo wotiyalle hamilowe itiyamaleye batalimale tle hamdepo. Epalati asiyama batalimaletapo aiyalma koko tle itiyamale hamdepo.

<sup>57</sup> Amasiyama dia: God dla sisiyema. Adipalati, ya:tapo dia:ye eleme di Lod Yesu Keliso tle batalimale koko mate epo polowe koko mateye ma-tla:mtauwapo.

<sup>58</sup> Epapedeme mikadepe dle so namkadulo, wua: kokalepo ha:ha:mama houlalimha:ha:miya. Epame alila hapuloma dulu dla Lod oko halowe yilo itiyamale mate ha:ha:iya. Adipalati, wua:malamana, wua:ta Lod dulu dla oko ha etapo isikimi koko pa:le pe-elasema.

## 16

*Mikadepe dle so Yelusalem dla ha:ha:lalo gadlowe dla namkale dle alisisi kolumolowe*

<sup>1</sup> Epedeme wua:ta mikadepe dle so gadlowe dla namkale dle alisisi kolumolowe koko dla na:ta Galasiya so sos hapuloma dla imuwa kokoye epo haiya.

<sup>2</sup> Wua: Sande alila hapuloma dulu dla wua:ta hatlope hatlope dletapo namkale dle alisisi wua: mate ala:leye aseka alikili dla kolumha:ha:lepe. Adipalati, eta na:ta wua: hala dla puluwe oloma edla wua: matle namkale dle alisisiye pokolumolowa.

<sup>3</sup> Epedeme wua: na:ta puluwe dla omha:ha:mama namkale dle alisisiye momolo kolupame eye halopo Yelusalem dla tlowe so opa mape hulupo ha:ha:iya. Epame na:ta pulupiye, isikimi yia: dla yu ilimale tlo hamilowepo, yia:tapo namkale dle alisisi kolumale e mate hamtelepo depame.

<sup>4</sup> Epele dulu dla na:ta yia: mate tlowe dla ka:dena dlepiye, eta na: ma yia: mate tlowepo.

*Polota mo hale dla tlowedeme dinapele koko*

<sup>5</sup> Na: Makedoniya tatile tapame matle wua: hala dla puluwepo.

<sup>6</sup> Na: pona:malamana, wua: mate halemama tene oloma mape wua: mate me-hallowe sepena. Epame wua: ka:dena, na:tapo ma etle hadima tlowedeme apalati na: gadloweye.

<sup>7</sup> Na: posolotamasema, wata oloma hema isikimi me-tla:mtamama wua: mila:pi tlamoloweye. Amasiyama Lodta solotamelepiye, eta na:tapo alila pasatale wua: mate halepo gudepame tlowepo.

<sup>8-9</sup> Amasiyama na: yipta wua: hala dla potlowa. Adipalati, Epeses mo hema na:ta ka:dle oko halowe kokoloma patota mo-dokostame elema. Amasiyama epapele tope na: dla opahale dlalo so ma pta wokasemana. Epedeme na: ala Epeses

mo midla halemama Pentikos alilata umulati edla tlowepo.

<sup>10</sup> Wua: Timotita wua: hala dla pulati woloma natilipe. Adipalati, ya: poka:dena, wua: dulu dla wota:le mate halloweye. Ame adipalati, ya:ye na:ta Lod oko hamsela:ye, ya: mape epapele oplamipo.

<sup>11</sup> Epapedeme na: posolotamasema, oplami haletapo ya:ye yimka:mala depame ya:ye alliweye. Amasiyama wua:tapo sadle mate ya:ye sepame ma hapele na: hala dla pulupo depame tane diya. Adipalati, na: ya:tapo mikadepe dle so opi mate pulupo depame ya:ye omhalema.

<sup>12</sup> Na: solotamuwa, di ei Apolostapo mikadepe dle so ya:mkadulo mate wua: hala dla tame woy-amelepo depame. Amasiyama ya:ta wua: hala dla puluweye alilata po-ala:na. Epedeme ya:tapo alila ka:dle natipame wua: hala dla pulupe.

### *Mosukulu yu*

<sup>13</sup> Wua: dinapopame mikadepe dle dulu dla kokalepo ha:ha:iya. Epame sikemte itiyamale mate damkowastame ha:ha:iya.

<sup>14</sup> Epame wua:ta koko hapuloma halomale dulu dla woloma bokotiyapo malamale mate halomha:ha:iya.

<sup>15</sup> Epedeme mikadepe dle so namkadulo, Stepanas aya dulu dla ha:ha:lalo so yia: kokoye mo-wua:malamana. Yia:ye Akaya mo dulu dla yia: tatile mikadepe dle dulu dla matimoluwapo. Epame yia: mape yiskamu yia: motoye mikadepe dle so gadlowe oko halomolowe dla hatitipo ha:ha:po.

<sup>16</sup> Epapedeme wua: ka:dena, wua:tapo yia: yu dla salladepo siyamoloweye. Epammama opa opi yia: epapele so yu dla mape salladepo siyamaiya. Adipalati, yia: mape hutulli mate God oko hapo.

<sup>17</sup> Na: Stepanas mate epo Potunetas mate epo Akaikus mateta na: hala dla pumulale dla siyema. Adipalati, wua:ta na: mate pohaha:lalo wekele koko dla yia:tapo na: gademha:ha:po.

<sup>18</sup> Yia:tapo wua: ka:pi gademha:ha:uwaye, epammama yia: ma watapo na:ye ka:pi gademha:ha:po. Epapedeme wua: epapele so dla sisiyemha:ha:iya.

<sup>19</sup> Asiya mo pato dulu hema sos popa:mtatapo yia:ta namkale dle yuye wua: watle hamima. Epame Akwila mate epo Plisila mate epo yia: aya dulu dla inoma sumha:ha:lalo so mateta Lod hi tle yia:ta namkale dle yu patoye wua: dla hamima.

<sup>20</sup> Epame mikadepe dle so hapuloma hema ha:ha: so mape yia:ta namkale dle yuye wua: dla hamima. Epedeme wua: Keliso dulu dla ha:ha:mama namkale dle mate asiyama huhulama asiyama huhulama demha:ha:iya.

<sup>21</sup> Na: Polopo. Na:tapo monolo na: do ikadepe mate namkale dle yu iye ilima.

<sup>22</sup> Epedeme oplami antapo Lodye pobokotiyapo malamalalo hallepiye, ya:ye ala Godta kasilamale isili dla halapo.

Yao Lod, wa: puane.

<sup>23</sup> Yesu Kelisota bokotiyapo malamaletapo wua: mate hallepe.

<sup>24</sup> Eso. Na:ta bokotiyapo malamaleta Yesu Keliso dulu dla ha:ha:lalo so hapuloma wua: mate hallepe.

**Ka:dle Yu**  
**Genesis, Exodus, Jonah, and the New Testament in the**  
**Kamula language of Papua New Guinea**  
**Buk Stat, Kisim Bek, Jona, na Nupela Testamen long**  
**tokples Kamula long Niugini**

Copyright © 2005 The Bible Society of Papua New Guinea

Language: Kamula

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023

74ad7974-9dcd-5470-9c22-0eda5fbabe15